

焦太史編輯國朝獻徵錄

焦太史編輯國朝獻徵錄卷之五十八目錄

都察院五

總鎮都御史

韓雍

唐珣

鄧廷瓚

史琳

張泰

周南

曾銑

張岳

何棟

王忬

談愷

總鎮侍郎

李棠

陳震

林富

潘旦

劉源清

楊守謙

王夢弼

鹿楨

張珩

吳琰

周滿

鄭汝璧

四明趙昌期

全枝

吳興茅元儀

錢塘徐象樸刊行

目錄終

焦太史編輯國朝獻徵錄卷之五十八

都察院五

總鎮都御史

都察院右都御史韓公雍墓誌銘

總督

劉珏

成化戊戌十月十五日致仕右都御史韓公以疾卒

于家有司訃聞上遣官諭祭命有司營葬域如制

公諱雍字永熙蘇之長洲人大父諱舉一父諱貴俱

以公貴累贈都察院右都御史祖妣陳妣趙俱贈夫

人貴初以間右起實北京宛平縣故公之發身乃順

天府庠弟子員正統辛酉中京闈鄉試明年第進士

并湖廣道監察御史時礪山縣學教諭丘純咎膳夫  
竹磨兒其父令其遠遁而以死誣告純他御史勘伏  
純坐償獄未決家人累奏冤都察院檄公覆公四散  
遣人踪跡之得磨兒於河南純得釋且復其官其聲  
遂大振時三法司刑獄并劾奏章疏咸經公手未幾  
超授江西辨冤抑黜奸貪所至望風解綬廬陵泰和  
等縣大寇卒至乘時劫掠鄉民苦之有司不能制公  
與巡撫侍郎楊公寧設法捕之得其首惡并餘黨悉  
置重典地遂寧代回陞廣東按察使迎二親就養少  
保陳公循疏公廉能幹濟才堪大任陞都察院右僉

新法

都御史巡撫江西公至則首推行均徭法次行歲辦  
法規畫周密切中時弊民甚稱便值歲饑大發倉廩  
賑之兼減價糶賣人得足食天順改元 英廟復辟  
改山西按察司副使尋陞大理寺少卿仍僉都御史  
與左都御史寇公深同理臺事嘗有強盜十八人當  
斬內二人訴爲同起盜挾讐誣指寇公曰會問已明  
何讐之有公曰人命至重宜暫留寇不允固諍乃并  
指者留之後四人皆得白翰林院學士倪謙主考鄉  
試得罪於當路緝事校尉發其結交遼府儀賓事下  
獄坐重典公復力諍得戍宣府錦衣指揮劉敬以石

建坐于下獄寇欲作朋黨籍其家公曰東漢時以朋黨二字盡賢人君子公宜審之寇悟改擬敬得千戶  
兩山東某衛時大同守臣奏巡撫乏人 上卽以命  
公至則劾總兵叅將貪財弛備皆逮於法修飭界牆  
搜括隱占軍士設法耕墾收米易銀是以邊備之用  
有餘而無私歛之擾衆顏三衛夷人因虜酋字來誘  
犯獨石公令軍出其不意擊之賊驚遁七年議政至  
京陞兵部右侍郎有權貴者素銜之陷以罪謫浙江  
布政司叅政成化改元兩廣蠻寇猖獗累征不利  
上命都督趙輔爲征夷將軍和勇爲遊擊將軍惟總

督軍務者難其人僉曰非韓某不可復改左僉都御史以行時言者謂賊在廣東宜逐之在廣西宜甲之衆議紛紛不定公大言曰大藤峽賊巢也舍此而不圖吾未見其能濟遂肅師而行抵廣西界議遣都指揮趙倫都指揮鄒宏副總兵范信叅將孫振各授以方略仍檄湖廣總兵李震預備公乃連管以進至全州謀報賊在湯洞公五發偏師連戰皆捷生擒渠魁數人皆磔剔以示軍威大振又以修仁荔浦皆峽賊羽翼乃分兵將爲二十五哨公與總兵官領中堅進攻彌月峽賊遂平路無阻絕捷聞賜勅獎勵陞公弟



馳爲錦衣百戶復移師潯州益增器械備餼糧令五  
哨由峽後進公督八哨從峽南進復令二哨援於後  
別遣將士斷諸山口賊聞乃掣妻孥輜重於岬極險  
處預於山南立排柵滾木礮石標鎗毒矢如雨而下  
公覘其將怠遂奮甲先登士魚貫而進聲震天地縱  
火烈焚日色晝瞑賊不能支乃遁去公益進衆云險  
不可進公曰破竹之勢不可少緩督進益急直抵橫  
崔等崖又進至九層樓等山壁立萬仞勢控霄漢公  
復計遣將士於賊所不備處攀緣至絕頂舉砲爲應  
衆復環攻數十合峽遂破前後得大小寨峒九百餘

處吹大藤峽爲斷藤刻石山頂以紀厥功初公令士卒得一山一寨卽堅守之故賊無可反之計許生獲虜男女以准其功故士無妄殺之慘又謂峽內餘孽尚存終必爲患宜設土官編管仍徙周冲靖寧二巡司於峽之上下增土人爲副巡檢復置千戶所以鎮藤縣五屯獠人凡可以固峽之策無不行之先是公命將與廣東守將共剿廉雷等處流賊猶未成績至是又分遣官軍往助旬月間生擒斬首及奪回俘獲共四萬一千七十有奇凱旋至廣東提聞陞左副都御史提督兩廣軍務公奏兩廣地方相去五千餘

里臣一身不克周悉宜用都御史二員巡撫從之會  
以父喪守制還吳既而六部各衙門大臣言梧州宜  
設總府總督等官居中調度殺賊良便從之卽其家  
隆公右都御史總督兼巡撫璽書聽便宜行事公至  
築城屯軍以鎮禦地方鑄鐵索柱繫浮橋而絕賊船  
置木牌以覺察奸細出官樞以瘞亡卒培松楨以葺  
先賢之祠皆大服人心九年少監黃沁以公務與公  
不叶訐奏數事公不與較卽具疏乞休致家居又六  
七年以山水爲樂君子曰明哲保身公其有之距其  
生則永樂壬寅十一月九日春秋五十又七公爲人

夷邁洞達才識高遠居家孝友與人交有信義下筆  
爲詩文思如湧泉無少凝滯居官處事動以古豪傑  
自居每一出師必以曹彬不妄殺爲法故所至全活  
甚衆累謫累起未嘗致欣戚於其間天下士大夫無  
間識不識咸仰其名云

成化十年三月命總督兩廣右都御史韓雍致仕先  
是鎮守廣西右少監黃沁訐奏雍坐視徭賊出沒隱  
匿不報以致斷藤峽賊復嘯聚滋蔓流劫郡縣且食  
慾飲宴濫賞妄費事多違法及副使范鏞僉事葉洪  
督調軍馬不能防禦互相隱匿武靖州知州岑鐸無

按取之功太平府知府郭本有貪淫之行皆當究治  
事下兵部奏差禮科給事中張謙刑部郎中蔡麟往  
按以其詞虛實各半復請 上免雍罪命致仕鏞洪  
鐸俱宥之本坐除名雍在兩廣威令素行沁不得恣  
其布政使何宜迂而固按察副使張敦貪而暴不爲  
雍所禮乃與沁媒孽其短搆摭其事攻訐之及差官  
往覈適委宜敦行勘竟醢醢以成其罪蓋雍未督軍  
之前賊勢不獨毒嶺南且越江西湖南界雍至賊勢  
大削雖不盡遏絕之然功多于罪至是爲內侍所奏  
黜公論爲之不平而兩廣人至今思之不置

實錄

都察院右都御史唐珣傳

總督

總督兩廣軍務都察院右都御史唐珣字廷貴直隸華亭人天順元年進士授四川合州知州鋤強植弱有能聲陞南京刑部員外郎郎中出爲福建福州知府時有男子詐爲中貴人入閩威勢張甚僉事以下多被笞辱莫敢誰何珣獨疑之乃壁人於浴室窺之得實卽座上執寘於法諸司駭服陞湖廣右叅政布政使尋入爲順天府府尹剏治繁劇事皆集辦秉法不阿豪貴斂戢陞右副都御史整飭薊州等處兵備兼巡撫順天等府以憂去服且闋命卽其家起之陞

右都御史總督兩廣軍務兼理巡撫嶺海府衛州縣  
戚長憚其風裁旋以破賊功賜金幣降勅獎諭弘治  
八年十月卒賜祭葬如例廣人士追思之

資德大夫都察院左都御史贈太子少保

敏鄧公廷瓚神道碑銘

總督

吳寬

國家有碩德偉度勤勞於外大臣一人曰都察院左都御史鄧公其諱廷瓚字宗器岳之巴陵人也公生有美質穎異過人稍長游縣學居諸生中落落不喜爲醜醜行人已奇之景泰丁卯年甫十八登湖廣鄉舉甲戌擢進士第明年授知浙江淳安縣抵任訪民疾苦專施惠政不求赫赫名終九載人無知之者故兵部尚書張公鵬時以都御史巡撫廣西獨知公爲知梧州疏且上會公丁嫡母楚氏憂不果服闋爲成



化已丑遷太僕寺丞貴州新設藩府府在萬山中百  
其未舉加以夷獠雜聚猝難撫治吏部求其人得公  
曰是前薦知梧州者公至悉心規畫凡城郭街衢及  
廟宇廨舍以次興造榜諭諸夷使受約束政令公平  
莫不感化墾田不怠入市不擾四境晏然蔚如中州  
上司以公治績異等交章舉薦吏部以民夷方安公  
治宜久任以慰之九載始擢山東布政司左叅政提  
督農務兼管水利弘治戊申再擢本司左布政使特  
踰年耳明年貴州缺大臣巡撫朝議以公請其土俗  
爲宜奏上允之卽拜右副都御史奉勅行俄下學

戴氏憂服閔適貴州墨苗久叛益肆守臣告急上  
仍勅公往視兼提督軍務尋改巡撫提督如故公初  
至遣人百計招撫不從始合衆謀儲糧調兵決策征  
剿兵至其地號令嚴明將校用命斬首幾六千級生  
獲二千餘口械首惡數輩赴京悉斬於市寇旣盪平  
公上奏都勻清平舊設二衛所屬合九長官司其人  
世祿驕縱稔惡釀患致夷人侵田奪貨逞欲無厭已  
四十餘年於此軍疲於戍守民困於轉輸其害不可  
勝言今幸黨惡剷除非大更張不能爲保境安邊之  
計凡所條陳十一事下兵部會議悉見施行始設都

身府一獨山麻哈州二清平縣一更擇流官土官兼治皆公所建白也初公遣養子夔之子乾馳入京報捷朝廷旣授以錦衣衛所鎮撫卽下詔褒公有首決用兵之謀共成平賊之功之語遂進右都御史貴州旣無事召公還掌南京都察院事兩廣自成化初故都御史韓公雍平寇之後開府梧州率以憲臣有才望及官高者總督軍務兼巡撫之寄公掌院事數月復輟之往公性不瑣瑣細故至是益思以安靜爲治屬吏有賢勞者輒舉薦以勵其餘或不職特去其一二太甚者若諸司濫設悉奏除之曰祿俸出於民母

徒費也。顧羣蠻以劫掠爲常，往往出沒閩楚諸郡。公以都御史金公澤巡撫偏方，非宜。宜以江西一省全付之，使二司竝聽節制。庶軍馬錢糧可以調度。其湖廣衡州設兵備，憲臣合遷治所於郴州爲便。又以廣東瀧水爲賊巢，宜卽其地設千戶所，調遣新軍守禦。仍宜給與隙地屯種，爲久計。奏上，悉從之。公於羣蠻結以恩信，兵不輕出，出則成功。若鬱林、川雲、靖、大桂諸種作亂，以次平之。其後四會等處乘機竊發，其勢尤熾。未幾，首惡李景光覃傑及其黨二百餘人悉被斬獲。兩廣竟亦無事。而公出入溪谷，衝冒瘴霧，則亦

病矣乃上章乞歸甚懇賜詔勉留特遣醫往視仍進  
左都御史以酬其功又三年上知公久勞邊務召  
還復掌南京都察院事未行以疾卒實庚申六月享  
年七十一公少孤事二母盡孝待其弟廷璋廷瑞友  
愛備至自爲州縣至大官處事求濟待人一不疑雅量  
廓如莫窺其際至所施設動中機宜其中明炳人亦  
莫能及也訃至上悼惜特贈太子少保諡襄敏仍  
命有司祭葬如例

資政大夫都察院右都御史贈太子太保都察

院左都御史史公琳神道碑

總督

李東陽

公姓史氏諱琳字天瑞舉成化丙戌進士爲工科給事中擢江西布政司右叅議遷左叅政孝宗廟歷遷左右布政使擢都察院右副都御史巡撫保定諸府兼督鴈門諸關歷工部左右侍郎兼左僉都御史經畧邊備以秩滿進都御史提督軍務署院事今上皇帝以提督功贈太子少保左都御史未幾又以卹典加贈太子太保凡閱三朝四十年官十命其卒也給驛傳遣官護喪治葬事賜祭者再及加祭亦如

還蓋其始終遭際之盛如此可謂難矣初公爲給事中時言事有體爲叅議時平鞏昌番賊脩安定會寧諸路邊備督甘涼軍餉事皆集以家艱歸闋服改福建有求開銀礦者公力阻之爲叅政時豪家多怙勢鹿盜每爲禁治袁吉二府饑發廩賑貸全活甚衆賴盜攻城邑殺官吏督兵勦之獲七百餘人梟其首惡脅從者皆釋不問爲布政時藩府歲祿多倍取民困輸納請自所治類輸之始大稱便爲巡撫則定均徭優戍卒開小河以殺渚沱水勢復興定保定二府柴夫舊額大明諸川果園皆居民世業嬖臣怙寵者奏

取以備供應公力言不可以數千人之命供一己之  
奉辭甚激詔遣官覈實果如公言乃止爲侍郎時嘗  
以災異言止織造惜供應諸事爲經畧時言募軍丁  
禁盜賊省中官差遣諸事多行之爲提督凡三命始  
赴宣府大同值虜退治兵食爲後計後虜寇榆林率  
偏師先往暨大帥至共謀規虜酋所在夜潛師搗其  
巢賊聞礮驚遁毀其廬帳而還以捷聞賜勅褒諭副  
以銀幣寶鏐入朝言便宜事加詳弘治乙丑新遣國  
事大喪方劇適宣府失利劇命出師公與大帥分駐  
宣府大同大同諸路斬獲以百計捷再上褒諭如初



特命中官迎勞於闕賜資甚厚下暨部曲並加犒賞  
殆近歲以來所未有也今年丙寅爲正德紀元正月  
十二日以疾卒自居九列前後請老十餘疏輒得溫  
旨勉留其在新政尤多眷注而勲業未究卒齎其志  
以沒悲哉公爲人坦夷宏豁不設崖岸意常近厚人  
以故多親愛之平居不事作業家無餘資然終其身  
未嘗以屑意也能戲作墨竹自謂天解尤喜談兵於  
諸推步占候醫學之術靡不通涉比見熒惑犯執法  
謂人曰是必有當之者已而左都御史戴公廷珍卒  
曰未也不踰月而公亦卒公生於正統

戊午四月十  
二壽六十九

右都御史張公泰傳

總督

李 濂

張公泰字世亨其先河南尉氏人高大父潛始徙汴遂爲祥符人世居汴城西關外三官廟之右曾大父眞大父敬祖父喜鄉稱長厚喜徙家肅寧大父父並以公貴贈刑部左侍郎始公之生也母馬氏夜夢神人抱一兒與之曰汝家世積陰德茲畀汝貴子其善撫育之覺而生公公器資英邁自少卽留心天下之務成化丁酉領順天鄉薦明年戊戌登進士第試政兵曹已亥授山東鄒縣知縣政尚仁恕六載績聞召補省臺適罹內外艱守制還服闋拜陝西道監察御史

史初監河東鹽課有勢要撓法爲奸公上疏劾去之  
嗣按蘇松常鎮四郡憲度峻整豪強斂迹時漕堤爲  
居民蟻聚其上五六百家歲久爲定業河漸淤塞公  
廉知其事奏徙而之他漕運通利再巡按山西劾罪  
貪酷吏若干人軍民咸稱快焉公在內臺滿九載擢  
陝西按察司副使奉璽書整飭洮岷河州等處兵備  
踰四年擢本司按察使明年擢山東右布政使尋轉  
陝西左布政使老成練達士論歸之未幾擢都察院  
右副都御史巡撫陝西而陝西之地公宦遊最久熟  
知利病乃掇軍民困苦者十餘事嚴例條約刊布

邑關中至今頃之踰年改大理寺卿時逆瑾用事公  
以剛直忤瑾免歸亡何瑾誅科道官交章薦公復起  
爲刑部左侍郎適延綏寧夏甘肅總制閔員廷議非  
公不可上亦知公練習邊事乃擢公爲都察院右  
都御史開府固原總制三邊軍務公咸上知遇拜  
命卽行至鎮則遷易將官振厲士氣一新攻守之具  
疏凡百數十上皆見嘉納奏捷者十有二璽書褒獎  
公盡心籌邊寢食靡寧竟以勞瘁成疾亟上疏乞骸  
骨命未下而卒得年六十有二有司馳訃以聞上  
悼公歿于王事賜葬祭贈太子少保刑部尚書子紹

以功廢錦衣千戶公沉毅有大畧平生不立崖岸與人交坦直無僞善飲酒多而不亂其爲鄒縣令洮岷兵憲二地皆有去思碑今三邊將士猶有能道其經畧之蹟者

論云余往赴官四明道經姑蘇其里居鄉大夫咸稱故巡按御史吾邑張公之才云張公巡按江南在弘治已酉風裁凜然嫉惡大甚按部所至貪黷吏率棄官遁去而除趙訥一事尤爲人所傳誦夫趙訥者長洲之巨猾也以捕盜爲名實與羣盜通羣盜輸月錢事訥求庇覆焉官所索之急則仇以獻輒牽連無辜人苦之莫敢言公廉得其實轉至廷下杖斃之閩郡謹乎以爲神明焉

都察院右都御史周南傳

總督

實錄

都察院右都御史周南浙江縉雲縣人由進士除應天府六合縣知縣遷授四川道御史陞湖廣按察司副使歷陞副都御史巡撫大同守制起復巡撫宣府尋改南贛陞右都御史總督兩廣以疾乞致仕優詔許之賜勅獎諭月給米二石歲夫四名家居凡十有四年而沒嘉靖八年六月予祭葬贈太子少保南在先朝以才見稱初大帽山賊流劫三省攻城殺人兇勢日熾朝議用重臣督勦乃以南往未幾遂破賊斬獲數千計因移兵攻姚源賊黨及汀漳山舉平之遂

自漢  
之始

其地南轅延撫之設寔自南始

前總督曾鈺傳

總督

實錄

嘉靖二十七年三月錦衣衛鎮撫司鞫上曾鈺獄情  
謂鈺交結大學士夏言令其子曾淳先後持金數萬  
託言妻父蘇綱致之言所朋謀爲奸妄議復套其前  
後掩覆失事冒報功捷具如咸寧侯仇鸞所訐上  
曰曾鈺妄議開邊隱匿喪敗殃虐百姓欺蔽朕躬罪  
在不宥法司會同九卿錦衣衛堂上官從重議擬蘇  
綱發烟瘴地面克軍夏言令錦衣衛差官校逮繫來  
京問已法司會擬鈺罪律無正條宜比守邊將帥失  
陷城寨者斬上曰鈺情罪異常有旨重擬乃稱律



無正條固可置不問乎仍依所已正律議擬以聞於是法司請當銑交結近侍官員律詔可乃斬銑於市妻子流二千里銑有機畧初爲御史巡按遼東會遼陽廣寧撫順兵變銑密運方畧悉捕首惡誅之全遼大定時論以爲才會虜患棘因不次見擢膺專閫之寄然銑躁迫無經遠弘猷自負遼左功謂天下事無難爲者其所注措率多誕漫巡撫山東聞虜入太原上疏請檄還山東兵戍關西者內守臨清爲時所笑比視西師乃倡復套議大學士夏言好邊功遂力主持之紛紛造舟車括鉛鐵關隴之間蕭然煩費矣時

虜勢方熾而我兵積怯銃疏下部議久之未覆上  
心亦危疑之密以訊大學士嚴嵩嵩與言不相能常  
思有以中之欲因是陷言尸間上指謂其非計說  
既行隨騰疏攻言言遂得罪去是時上怒銃甚然  
實無意殺言也會咸寧侯仇鸞先爲銃所劾有旨逮  
詔獄鸞上書闕下自理嵩因授鸞意令以復套事攻  
銃賄言表裏作奸覬圖大福及鎮撫司奏獄具下法  
司擬罪凡再議銃言竟以交結近侍律俱論死鸞罪  
得釋遂厚賂嵩兩人深相得鸞益橫鸞不法以及於  
誅銃既死家無餘貲妻子狼狽遠徙天下聞而寬之

都察院右都御史張公岳傳

總督

張岳字維橋爲人沉毅簡重正德癸酉解元丁丑進士授行人寓慶壽寺不苟接人獨與郡同年陳琛林希元閉戶讀書出則三人徒步走市中時稱泉州三狂岳獨上書言事武宗寢疾豹房獨宦者侍岳疏乞內閣九卿輪直嘗藥庶防奸變疏入不報已卯四月宸濠行賂嬖倖蠱南巡諫者數十人多杖死岳偕行人司疏上鎖械曝跪廷中五日摔下獄又杖於闕下幾死謫南監世宗卽位復行人俄丁父憂釋服赴部廖太宰取選科道辭不就轉司副尋乞南陞南

武選員外祠祭郎中丁亥復以憂歸每言平日所爲客氣用事多病狂疎於是深日刻勵孜孜益嚴服除補主客郎中出廣西提學僉事廣西士櫟岳懇懇與講文義壬辰調江西念士習空虛嚴責守程朱氏說毋輒變尋貶廣東提舉岳爲郎時上議禘祭張閣老孚敬議推先代某祖爲所自出之帝李宗伯時心知不可又未知神位之銜之所書疑以問岳岳請書皇初祖位堂堂天子之祭精誠以臨之雖遠而千百世可假而至也豈必附會某祖以爲重哉李以岳言語張怒以原議上內批皇初祖如岳言於是爲

張所忌出廣西張又行選貢法邊縣雜夷多不任貢  
岳謂選第汰甚衰謬者足矣調停行之拜表入京又  
不候見張而歸張愈怒故遂坐濫貢貶轉守廉州廉  
與交南隔一水時方征交張請吏部推岳征交議譁  
甚岳獨爭謂不可疏六不可征之狀聞於朝疏上又  
陰飭兵食立營堡預征討之策以待命毛尚書伯溫  
出視師莫登庸懼密使岳求通款已亥陞浙江提學  
副使轉叅政伯溫頗用岳言議撫處登庸問曰向廉  
州太守安在也伯溫會督府蔡經奏移岳廣東守欽  
廉莫酋叩關岳往受降賦二詩予之北虜盜邊入內

地詔陞僉都御史撫治鄖陽俄轉江西巡撫岳言江西民困用民一錢如針刺吾體血吾不忍也陞副都御史督撫兩廣督府故饒供億岳至盡革之土官從征舊多納賄乞功岳嚴禁絕封川賊稱王橫劫岳討平之陞兵部右侍郎再征柳州破魚窩馬鞍諸險巢時稱奇功岳不通相府一幣總兵加太保岳止陞俸越年召爲刑部右侍郎徐御史南金奏岳忠純果毅有古大臣風賀連反側未定岳宜留明年召爲兵部左侍郎平連山賀縣捷聞總兵又廢于岳乃陞右都掌院事湖廣苗猖獗初設總督衆方顧望莫肯行世

蕃請岳當之徐相公階報岳曰士君子爲國任事禍  
福無擇第其危幾在前冥不知避亦不可謂智也蓋  
指嚴氏父子云岳謂備國大臣雖危無所避也單車  
入楚熟計苗情諸撫臣異同前卻而苗出劫日橫

上命易貴撫院岳謝

上曰充國湟中之議初頗譁

於衆口裴度淮蔡之役功竟成於獨斷又曰此賊不  
平臣亦有何面目奉勅書以對將吏於是條上用兵  
方畧詔下報可岳自督戰斬擒苗幾盡土宣慰冉玄  
等糾苗爲叛苗平懼誅陰以兵噉龍許保吳黑苗搶  
思州玄又挾萬金入世蕃幸世蕃去岳而罷兵徐相

公執不可竟降兵部侍郎岳生擒龍許保而黑苗尚  
圍玄所岳疏玄罪併訐其挾金事世蕃益怒日傾岳  
岳不一貶復擒黑苗以獻三省底寧兵部力請召岳  
嚴氏不可岳遂卒是年夏西南大星隕岳曰我當應  
之卒後三省巡按奏岳功岳復右都賜祭葬贈太子  
少保謚襄惠廕子嚴氏擅政二十年制閫不入一錢  
沒得完其身名者僅岳一人耳岳長身玉立隆準高  
顴眉骨稜稜天性孝友篤人倫學以程朱爲宗嘗謂  
陽明與論持敬知行明德新民之旨往還三日陽明  
終不能絀第曰子亦閩中一豪傑也歸家於草堂中



立爲學則存養四條動作威儀之節十七條出則輒以程朱微義諄諄言之集中有與聶豹鄒守益歐陽德郭持平羅欽順張邦奇黃佐諸公書大畧如此宦所如沅柳州德慶廉瓊咸專祠鄉則泉州祀郡學思安志交南議稿征苗錄所輯禮經聖學正傳恭敬大訓等書凡數千卷

資德大夫都察院右都御史兼兵部左侍郎太

華何公棟墓志銘

總督

王用賓

公諱棟字伯直號太華其先直隸巢縣人高祖德才  
元末避亂關中占籍長安曾祖義隱德弗耀祖寬父  
真皆以公貴贈通議大夫兵部左侍郎兼都察院右  
僉都御史祖母姜氏母左氏俱贈淑人公生而岐嶷  
讀書一覽輒悟比爲學官弟子督學朱凌谿先生以  
國士待之正德癸酉舉鄉試二名辛巳登進士選授  
河南道監察御史公正色獨立坐失朝儀調直隸宜  
興知縣公體恤民隱釐正士習築便橋修學舍邑有

修通  
惠河

巨狹狹輸其土公首寘於法士庶咸悅嘉靖癸未丁  
通議公憂邑民肖像祀之丙戌大學士遂庵楊公疏  
薦陞順天府通判戊子 上命修通惠河進陞工部  
都水司郎中公疏鑿故道蓄溜上流建閘築堤務圖  
久遠甫五月而告成自是糧運直抵大通橋歲省輸  
費十二萬緡 上心嘉悅陞俸一級賜白金綵幣尋  
陞通政使司右通政仍督河務辛卯京師恭建四郊  
臨清陶甃官軍疲於傳運公疏請過漕舟不論公私  
量爲附載上下便之是歲陞太僕寺卿奉使河南冊  
封周府壬辰九月轉都察院左僉都御史巡撫大同

是時彗星出於井之朱度朝議洶洶以爲大學士某  
輔政之應公考索象緯玩繹圖經上疏畧曰井之未  
度大同分野彗色蒼赤兆主兵變期年之後大同當  
有圍城蹶將之災聞者嘖嘖誣爲黨附公至鎮中嚴  
紀律拊循營伍虜入高山站選將勵兵俘四十九級  
邊境肅然無何臺臣仍以星數論公左遷四川布政  
司左叅議公去三月大同軍亂據城肆逆果如公言  
人始服先見云公家居十有八年庚戌八月虜犯畿  
輔上赫然震怒思靖邊圉大學士華亭徐公時爲  
大宗伯具疏薦公上召公爲右副都御史開府前

州提督軍務公感激遭逢遍歷關險自山海抵居庸  
延袤二千餘里修築邊防分爲十區計區戍兵計兵  
設將遠近銜緩各相聯屬一遇警報互相策應復恐  
兵分勢寡各設遊兵列營應援因疏安攘六事 上  
悉允行自是醜虜震懾疆場寧謐矣辛亥 上進公  
兵部右侍郎兼右僉都御史總督薊遼保定軍務咸  
寧侯仇鸞驕橫貪功請伐朵顏福餘泰寧三衛 上  
降勅令公會勦之公抗疏諫止藉藁待罪謂三衛爲  
我藩籬世修職貢庚戌之變實逆酋陳通事哈丹兒  
爲之嚮導乃若因茲小醜大開邊隙是自徹藩籬增

一勅敵如社稷陵寢何 上若曰御史言是伐衛事

竟寢頃之公密遣將士指授方畧擒禦導二酋以獻

上進公左侍郎廕一子錦衣衛正千戶壬子擒黠

虜孫黑子等 上賜白金文綺廕一子冠帶總旗兵

部第其功狀乃於正千戶加廕二級命公家孫承勛

爲錦衣衛指揮同知公歷督府三年計修邊牆三萬

八千丈計獲俘虜三百三十級甲寅考績 上進公

右都御史兼兵部左侍郎廕子瑛爲國子生公尋上

疏乞休 上賜俞允後四年丁巳侍郎吳某因臺臣

論列辯疏及公奉旨開住隆慶戊辰太宰楊公以撫

臣職請奉詔具題致仕進公階資德大夫今 上御  
極公年踰八十三矣有司奉詔問勞儀幣優緝公望  
國稱首感極泣下秦王雅重禮公親臨問焉越明年  
爲萬曆癸酉五月十一日公以疾不起距其生爲弘  
治庚戌壽八十有四公博綜羣籍篤嗜數學商確古  
今如指掌上臨機應變算無遺策議者嘗欲起公總  
持國計不果識者惜之所著有督府奏議詩文各若  
千卷

資善大夫都察院右都御史兼兵部左侍郎思

質王公忬墓志銘

總督

李春芳

都御史思質王公者吳郡太倉州人也以明經起家累官至右都御史肅皇帝時嚴氏竊權以私恚陷公及禍伯子憲副君仲子進士君痛公命殞亡辜則棄官扶公柩去去八年而今上御極渙發維新之號於是憲副君上書自寃得還公故官已乃狀其遺事寓書都下徵于銘予與公同舉於鄉與憲副君同舉進士乃受書發狀曰嗟憲副君以世誼要予哉是役也予敢以不文辭遂爲志而銘之志曰公諱忬字



民應思質其別號也少以文學名三吳嘉靖十年領  
應天薦又十年舉進士授行人選監察御史擢僉都  
御史轉副都御史兵部左侍郎進右都御史敷歷中  
外凡二十年而長轡駸駸乃落穽嚴氏未覩其竟搢  
紳大夫莫不扼腕惜也公爲人闊達亮直才能通敏  
始以繡衣白簡剔蠹鋤奸風節凜凜人業以真御史  
目之及見公出秉斧鉞坐鎮疆場禽蒐島夷草薶荆  
虜則又咸歎服以爲卽古張韓莫過也行人時常使  
淮藩王以例餽遺却不受及監中城 皇太子當出  
闕乃疏列三事其一言崇師重道其二言慎選官僚

其三言六局丞郎尤當慎選疏上中外避之已按湖  
廣卽劾罷所部諸貪墨吏曰必及吾瓜而後罷謂楚  
民何由是威行部中部中吏無敢漁獵細民者中官  
廖斌鎮承天擅勢毒民而陷前部使者至戍顧獨懼  
公終公任無敢犯庚戌秋虜猝擁數萬騎犯古北口  
而守常論者徒謂不旦暮却矣公時按順天乃獨笑  
曰古北與虜一牆限耳我兵恆不勝敵卽突入柰何  
通州聚六師之儲要地也願爲上守之乃卽日行  
部至通亟趣吏士登陴舟楫在東岸者趣徙之夜半  
虜果大來竟不能踰河而西當是時烽舉燧燔咫尺

相望 先帝憂甚公乃首以疏聞 天顏爲霽已又  
知公晝夜擐甲視軍城上特旨擢公僉都御史公拜  
命則疏請發帑以振諸中虜者又言京城無外郭彼  
賊之入民實解之築外郭便 先帝從其言時有議  
增營兵者公乃疏曰京軍歲費芻糧百萬緩急無從  
賴宜汰何云增請別設總督大臣轄邊鎮資其兵力  
以拱衛神京及諸所條陳數事後悉行其言而又請  
增修通州二城費省且固 先帝乃賜以金幣壬子  
巡撫山東僅三月會倭奴寇浙且侵閩中廷擢公提  
督軍務巡視浙江兼轄福建漳泉二郡無何改巡視

爲巡撫公至則委心叅將俞大猷湯克寬而奏釋在  
緊都指揮盧鏜尹鳳數人者皆東南折衝將也括蒼  
多惡少年則以其人悍而喜鬪招集之以分置諸部  
於是謀知賊衆巢據海港橫嶼中而環列巨艘爲水  
寨授策諸將夜從間道火其巢賊衆大潰搶奔舟中  
隨而擊之幾盡忽風起勢亂賊乃得脫所俘馘三百  
餘級而焚溺死者亡算公所釋尹鳳者時部閩兵則  
邀餘衆於諸洋又擊之所俘馘亦三百餘級捷聞  
先帝賜以金幣是時賊魁數輩而蕭顯者號爲尤狡  
率勁倭四百屠南沙還逼松江松江守告急公願謂

曰我出汝死何以報我盧因跽曰請取彼蕭顯以報公命卮酒壯之授以銳師盧倍道掩擊大破之按江左者疏聞以爲越境全郡其功尤偉賜金幣如初甲寅秋七月虜入大同殺大將覆其師下撫臣獄議置代未決先帝諭分宜中外臣誰爲真忠者分宜不知所對上曰朕向所自拔王忬耳遂降手勅擢右副都御史移撫大同公聞命卽趣裝北行之日吏民攀泣遮道輿不能前而大同人聞來撫者爲公則忻忻然相語曰是嘗勦東南倭者今北來吾屬聊生矣至則上疏具言歲校與軍所以乏狀請發金錢十

餘萬賑之則自大帥下至偏裨約母次第侵給者所  
籍以全活甚衆時北虜入寇公會宣府兵破之捷聞  
擢兵部右侍郎兼僉都御史已轉左兼都御史移節  
鎮薊遼則又大集將佐講畫戰守利害條上八事悉  
遣諸將分守要害而自以精騎居中調度時把都兒  
等擁衆入犯擊敗之旣失利復悉衆入犯又擊敗之  
而東虜犯遼左者又發兵擊敗之獲虜數百招徠夷  
漢千五百戶明年虜小王子入犯又擊敗之先後上  
軍書蒙賜金幣者三進右都御史予一子世襲千戶  
公辭弗受又明年大舉勦倭乃授兵偏裨而南有功

又蒙金幣之賜明年虜入潞河諸地稍被剽掠詔乃切責於是奪公一官尋以虜來窺伺鹵其馬畜過當竟遁去於是復所奪官尋又四敗東虜於遼左乃錄一子入胄監復雨賜金幣戊午秋大虜入犯諸隘公督將走之明年又破東虜於遼左斬首八百餘級奪其馬畜夷器甚衆當是時廟堂之上聞捷書至者人人稱快以爲犬羊二百年來未有受此大挫顧獨不懌於嚴氏惟恨不卽笄之先是公監視中城時有中貴人宋興者領東廠緹騎瓜牙張甚京師側目莫敢誰何公則抗疏劾之興蓋嘗行萬金近倖及嚴至是

復僭行金疏且辯嚴乃調以溫旨然上業知興橫  
竟罷之而嚴負金懷慚佯曰侍御好手一白簡散大  
璫二萬金耶自是不能忘情於公始鎮薊遼時秉兵  
政者則今豕宰楊公諸黜陟將臣無不取公意而嚴  
氏父子方貪饕於債師乃竟不得一染指大以爲憾  
及代楊公者其所陟黜則惟嚴意所欲公歛然曰將  
者三軍之司帥也不程其材勇而惟賄之畀不敗公  
事耶會員外郎楊君繼盛者以劾嚴受禍公問之恨  
彈指出血而憲副君又故與楊善爲經紀其喪事嚴  
氏耳目伺得之憾乃深於骨髓矣故於虜人灤河奪



公一官其後給事御史出覈邊者示以風指而給事御史還以實報大拂嚴意是時薊鎮多故嚴幸以此中公復指授按邊郎郎於是入奏公交事事而嚴擬詔則責以後効比斬虜八百餘級嚴悉格不錄及請兵爲援嚴則從中沮格後虜乃乘灣淺突過至薄都城先帝因不知公請兵第停祿爲秋防筴示罰不欲重也而嚴客乃嗾御史論公以媚嚴下錦衣獄世蕃取讞牘削去功次巧詆以辜踰年乃竟不免嗟乎先帝用公以始能勤事也彼譖人者以終怠浸浸說能不怒且恨耶蓋背德者人情所至憾也况君臣

之間乎公在繫中外固知爲嚴氏構陷徒謂公德在  
閭閻不宜禍終至是莫不傷公而恨嚴氏之謀毒也  
公卒後一年而御史論公者以自恨死又二年世蕃  
以僂死嚴罷歸以編氓死而嚴客坐奸黨遣戍不數  
歲諸陷公者殆盡而公之功臯旣明竟還故官天道  
哉天道哉公孝友天性質庵公八十命終公猶以生  
晚不逮養每與陳淑人語及泪輒簌簌下因號思質  
以志痛事兄及姊恭而能讓侍郎公嘗置田千畝贍  
族公以戎事倥偬念其久且瘠歲別捐米三百石益  
之以贍族之貧者乃諭憲副君伯仲勉嗣厥志人有

一善懷藏不忘橫意相加未嘗累前任人不貳御下以恩故人樂爲之用間關南北十有餘年或謂暴露良苦當他圖公謝曰吾而易誰當難者吾知盡瘁而已嗟若公者殆所謂忠爾忘身者歟公生正德丁卯五月四日沒嘉靖庚申十月一日得年五十有四子二憲副君世貞進士君世懋

又傳

李攀龍

王公忤者蘇州太倉人也其先始興文獻公導遷江東至宋左司諫縉徙分水至元夢聲爲崑山學正因家焉故崑山改太倉夢聲之孫琳生輅武宗時王

倬以進士顯名爲南京兵部右侍郎卽輅子也倬生  
忬舉進士選御史屬 皇太子當出閣疏上重師道  
檢宮僚戒淫戲者三事 世宗納焉又中貴人宋興

行萬金求領東廠公論罷之出監河東鹽法歲餘以  
疾歸間復爲御史按湖廣至輒劾方岳郡守貪不職  
者一人不及代也時中貴人廖斌填承天公謂曰貴  
人所不魚肉吾百姓者吾請事費人貴人所不知而  
舍人子魚肉吾百姓者吾爲百姓治之不以貴人  
凡吾有所裁終始全貴人耳還復按順天八月虜數  
萬犯古北口公具聞上請屯京城而身往守通州已

而虜果大人至通竟不能渡河而西 上謀諸輔通  
獨完乃超爲僉都御史經畧通州以東諸軍會虜退  
衆議欲補京軍公又獨請汰之歲可減漕粟數十萬  
得沿邊數萬壯士及請築京城外郭設薊遼總督置  
通涿昌密爲四鎮奏上各次第覆如指何公棟旣總  
督遼薊與大將軍仇鸞調諸邊兵數十萬衛京師而  
公兼治餉鸞挾 上愾公以軍興法公若爲不悟而  
身歷諸要害爲伏芻粟卽鸞所遣騎異道至咸取給  
焉乃上請得三千騎與臣因糧車爲戰守可以無乏  
軍興頃之歸治餉戶部召還京鸞竟誣而公得無以

賄免壬午巡撫山東凡三月巡視浙閩提督軍務亡  
何改巡視爲巡撫請誅賞便宜行事南會二廣北會  
江左諸鎮犄角應援也屬倭賊王直徐學毛勲輩強  
我公夜縱狼土兵括蒼少年以俞大猷湯克寬擊之  
鹵獲倭生口百四十三首百五十級焚而溺殺者數  
百人軍大振以尹鳳將閩兵徼於表頭北焚諸洋又  
鹵斬百餘級奪生口二百餘後先以捷聞是時賊黨  
蕭顯率勁倭四百餘屠吳郡南沙還過淞江淞江守  
告急公曰吾嚮所請犄角者非此乎以別將盧鏜檄  
擊大破之斬蕭顯餘衆潰入浙中大猷諸將徼殺無

予遣是役也越境而殲虜且陸勝賊矣因行部凡二十餘縣計倭所由道次第畢城之獨慈溪謝不可公去一歲而慈溪破始就城相請不蚤聽王公言公在浙閩可二歲凡一十餘捷功次三千餘所得沿海大猾爲倭內主者繫之覆其家數十人賊自是無與鄉導往往食盡遁矣甲寅移巡撫大同先是虜入大同沒大將覆其師撫臣坐失律下獄議置代未決上諭相嵩中外臣誰真忠者嵩惶恐不知所對上曰吾嚮所自拔者王忬耳遂手勅吏部朕念大同須得人其以忬往故事唯置相用手勅蓋異數也比至鎮

上書具言歲侵乏軍興狀請大司農金錢十餘萬賑  
之活者萬計會虜復入寇與總督許公某合兵徼破  
之捕首虜百餘鹵馬牛羊稱是捷聞進兵部右侍郎  
兼右僉都御史明年薊遼總督楊公博入爲兵部尚  
書議置代 上度次用公進兵部左侍郎兼右副都  
御史旣代而虜首把都兒黃台吉打來孫等數萬騎  
入犯古北喜峰冷口諸隘公悉發兵拒走之條上八  
事報可乃分遣諸大將趙卿輩以馬步兵十餘萬守  
諸隘游兵佐之與宣大督臣約諸地在宣大而險在  
內者移宣大兵爲內守地在薊保而險在外者移薊



保兵爲外守九月虜悉衆屯懷來川攻南塘黑衝峪  
已又攻大石溝公各發兵拒走之捷聞進右都御史  
兼兵部左侍郎如故奏減諸路防秋騎兵馬六千餘  
匹曰守利步不利騎柰何以二戰士食供一馬非策  
也虜先後寇遼陽所發兵敗之首虜數百又招徠夷  
漢一千五百戶丙辰 上欲用爲兵部尚書輒不果  
時大舉討倭發兵五千人以裨帥尹秉衡往有功九  
月打來孫等又犯喜峰一片石諸處公督兵拒走之  
明年虜闌入灤河頗有所殺掠復料其力戰走之詔  
切責奪一官爲右侍郎兼僉都御史餘如故會兵部

員外郎楊繼盛疏嵩父子爲所陷抵罪公寬之公子  
世貞又爲護繼盛喪嵩父子益銜之矣明年把都兒  
辛愛打來孫俺眼他皮各以十餘萬欲分犯馬蘭義  
院諸口謀有備不敢發詔復所奪官明年戊午虜犯  
遼左我師一歲凡三捷九月虜王文土蠻黑石炭諸  
部十餘萬騎駐大鱓場以精騎七千犯界領箭捍領  
以大將歐陽安馬芳等拒走之數萬騎入黑谷領以  
標中軍張倫等破走之而練兵之議起矣是時兵戍  
益壯可省調發十之六七大司農省軍興芻粟稱足  
見以爲名美而戍卒多選與不習戰所勾募取充數

而已諸將計不敢任而調發如故公乃爲疏具例十  
三事請以三歲舉之明年虜又犯遼陽以楊照大破  
之獲首虜八百有奇鹵馬牛羊夷器以千計故事獲  
首虜至二百卽以捷聞至四百以大捷聞今至八百  
以嵩故願無有爲上言之者故事春防所調發兵視  
秋省十之五至是以練兵故復汰其二而虜辛愛數  
萬騎挾朶顏酋影克哈孩爲嚮導謀入寇我我所遣  
謀多被殺公乃請授兵不聽虜竟入潘家口我以輕  
騎繞出賊前凡三日引去尾擊之捕首虜百事聞  
上乃知前所請援兵非謬第錄諸將歐陽安輩下獄

而御史以嵩風旨且論殺安會御史方輅受草都御史駟懋卿言公病悸不任事負上恩當罷狀遂達制獄論殺公隆慶改元世貞守闕下白父寃狀以詔復原職公好稱說經術而長於吏事凡三爲巡按一經畧一提督三巡撫一總督所推轂賢士大夫徧天下也 贊曰大臣之處成功難言哉庚戌虜犯京師中外洶洶公先策必至以聞而身守通州使不得西渡河嚴邑翼翼輔以無恐 肅皇帝張皇備胡左顧右盼念無可與所立一總督一大將軍而公以督餉叅間並見倚重尋視閩浙旋移大同虜過已則奉而

南倭逼已則奉而北非不欲任久之以聽厥成而  
天子厲精方稱緩急圖輒効喜自拔士號爲大同得  
人異數寵之以逼帷幄之臣度次薊遼而公拒走大  
虜者六至有一歲三捷者柰何不免嵩父子文致之  
也自練兵之議起而間以生柰何比年治師不中調  
發自期三歲也所疏十三事具是矣 天子方喜自  
拔士號得人度次以薊遼乃有上言不任事負國恩  
當罷則誰爲之者激極而反大臣之處成功難言哉  
余觀世貞上疏追訟父前功曰虜犯遼左臣父忤以  
總督總兵楊照輩便宜發兵擊破之斬首八百餘級

策定城池功施邊境嵩父喉削臣父功狀並薄照實而塗先帝拊髀之明成化間總督王越潛師出塞至威寧海殺首虜四百餘級封爲列侯臣愚以爲比罪則遼陽爲肘掖之寇於我爲必應量敵則掠出榆林塞於虜爲情歸用師則楊照一部將計勝則首功過當威寧者多而懲其深入者悛慮敗則潛師出塞劫虜取捷者危越封而臣父不錄令當先帝之世無以春秋耀軍士而示天下以非常功不知遼左之役見以爲狎戰而嵩得持之威寧以汪直與俱出塞氣奮人主同功一體者乎將相不調和自古患之矣

都察院右都御史十山談公愷墓志銘

絕

李春芳

隆慶戊辰正月十六日都察院右都御史十山談公卒於家訃聞上賜祭葬如制公諱愷字守欵上世

汴人扈宋南渡徙無錫至壽齋公某而族始盛又五世生紹贈南京湖廣道監察御史公高祖也曾祖諱復封南京刑部郎中祖諱綱仕至萊州府知府考一鳳仕至平江知縣後以公貴兩世俱贈兵部右侍郎兼都察院右僉都御史云公生有異徵甫釋襁厥考攜過夏口墮江漂五里竟不沒坐於沙渚觀者神之

幼卽奇警弱冠有俊譽舉嘉靖乙酉鄉試登丙戌進士授戶部江西司主事奉詔使閩還值考君病風痺公日侍醫藥供養甚篤繼執二親喪致哀盡禮比服闋如京無以爲裝至習田乃行復除戶部浙江司主事權稅河西通商抑豪及建白利漕四事聲大起轉四川司員外郎巡通州倉有外戚漁利者請增造船於通惠河公疏爭增船五不便乃止尋復監兌江西督漕儀真並展嘉畫已進江西司郎中歷守度支先後官大司農者咸倚重焉八年而出爲山東按察司副使適王少司馬檄開馬場湖歲方大侵同官多役



丁夫民苦之公獨無所役且念可因以寓賑乃懸激  
募僦發帑授直三日而應役者三千人旬有二日而  
工畢王少司馬喜甚首上其績妖民趙雲假符印惑  
衆取財遷者欲目前巨寇趙雲姓株及邀賞公廉其  
妄止當雲罪餘悉宥之癸卯山東鄉試御史葉某以  
監試屬公會御史以試錄故譴死詔獄公亦坐貶信  
宜縣典史尋量移懷慶府推官台州府同知久沉下  
僚意泊如也五遷乃復爲四川按察司副使蜀方有  
盜警諸平民被誣引者多竄伏且及於亂公至立釋  
之命復故業羣黨解散逾年擢山東右叅政轉按察

使晉福建廣東左右布政使所在職舉乃簡擢都察院右副都御史巡撫南贛汀漳時懲賊李文彪海寇徐碧溪等釋騷浙楚閩廣間濱海城邑多陷沒者公乃開布誠信招降文彪而疏上機宜六事以制碧溪未幾碧溪復寇潮公授策海道汪副使率兩指揮邀擊之會颶作我師乘之碧溪溺死俘斬無算虔州以寧捷上有白金文綺之賜旋進公兵部右侍郎兼右僉都御史移鎮兩廣兩廣山箐險密蠻寇盤據已久明年突發嶺西聯絡新會溪洞四出焚掠殺千戶黎元公畫策分兵進勦一鼓而殲其渠率捕斬五千五

百有奇是役也兵僅三萬時甫四旬而蕩平諸巢略  
定五縣衆方擬諸藤峽之捷顧內有嘆公者言者受  
指抑之故叙功僅得廕一千餘陞賞有差時論惜焉  
公在軍日久念母王太淑人髮髭髭白時方勦大羅  
山賊將就俘矣乃懇乞致仕得請卽行後總督王某  
追疏公績云大羅山賊阻險肆毒積久難制間者師  
出四月薙彌無遺匪臣實能皆前總督談某籌略豫  
定故臣得乘機致勝乞首錄以勸詔進公右都御史  
致仕公性孝守潔抗爽敏練以久官戶部故版圖鉅  
殺之數纚纚如指諸掌尤曉暢兵事臨敵遣將親授

成算羽書露布悉自手出雖矢石如雨而意氣安閑  
故所在克捷云百致政歸築園九龍山麓多積圖書  
其中日召故所與遊者置酒賦詩其曠達文雅鄉人  
咸起敬焉所著有孫武子十三卷虔臺續志五卷平  
粵錄三卷奏議文集若干卷距生弘治癸亥十二月  
五日享年六十有六

刑部右侍郎李棠傳

總督

實錄

刑部右侍郎李棠浙江縉雲縣人宣德庚戌進士擢  
刑部主事正統中陞員外郎清理南京法司刑獄平  
反冤抑甚多遷陞本部右侍郎巡撫廣西頗有時譽  
朝廷嘉之尋命提督廣西軍務賜白金綵幣以旌之  
歸天順四年十二月卒遺官諭祭命有司管葬棠爲  
人廉介不苟取旣休致家無餘財鄉邦重之

通議大夫兵部左侍郎陳公震墓志銘 康海

公諱震字文靜上世武進人也曾祖肆從 太祖皇

帝定天下有功累陞都督僉事而廕其子友爲蔚州

衛指揮同知正統間改慶陽衛故今子悉居慶陽云

指揮公生二子長福季祿福公父也當襲而卒後以

公貴贈監察御史配孺人汪氏生公先是御史公夢

老父以玉麟與已曰是汝子當以文易武也已而公

生神宇凝重氣度洞達人咸異之洎長受易於鄭州

王先生未幾有內艱焚焚無依乃依叔父祿而禱天

性孝友視若所出故公得肆力於易成化甲午中鄉

試高等數試禮部不第益自砥礪卒登丁未進士弘治戊申拜監察御史風裁凜然凡所按行姦貪望風而解寃者平遠者釋時以爲真御史也丁巳陞山西按察司副使恥尚嚴峻務以德化而已壬戌陞本司按察使憲度益脩人用丕變曰風俗相沿則頽弊滋至至是不可以文法繩易也曷以禮教興起其義意人能知義則廉恥生廉恥生則器訟自息此古人之已行復何疑者今山西人重廉恥尚禮義遵矩履規無復曩昔風聲氣習之累者公之教也正德初以御史盧儀事註誤左遷兩淮運鹽使司同知尋轉長蘆

運司而支正三品俸公曰是不可以已乎於是力請致仕得允居數年吏部薦公才可重授陞光祿卿已復陞戶部右侍郎庚午夏值賓藩反逆改公爲兵部右侍郎兼都察院左僉都御史總全陝之師以討之京師至寧夏四千里公但以十九日至則罪人已獲公乃宣布上意撫安夏人而屬鎮西將軍曹雄收其餘黨其審實叛逆悉命指揮黃正起解於是寧夏遂定還及中途會遼菴先生以命至與公代兼有勅獎勵公之功伐八月劉瑾伏誅公罷歸慶陽會辛巳詔復其原秩致仕嘉靖乙酉正月壬午公壽七十又



九而卒公立身甚嚴而遇事不苟夷居明習國家之事無鉅細執其樞要至於低昂起伏有智者萬慮而不可及者使公得究其所指則古將相之業奚媿哉公又無所不學天文律曆具得其妙京房管魏不讓也慶陽北定邊營有妖自名趙太白日與人盃酒相集定邊諸貴人自叅將指揮以下罔不狎而遊之有貧乏者妖輒重以贖予及所厭怒卽以鐵簡飛擊之妖知公來定邊詣其所親謂諸貴人曰明日慶陽陳舉人至我與有干係不可相見當與諸君永別已而公至則稟賦之正爲物所畏憚如此洎公之貴姦邪異於朝衆強畏於野可謂明明無間終始弗渝者矣

兵部右侍郎林公富傳

總督

柯維騏

林富字守仁號省吾城東人儋州同知洪之玄孫也富生奇偉敏達弘治壬戌與叔塾同登進士授大理評事忤權鑄劉瑾繫詔獄降潮陽縣丞隨以大理寺文致罷官仍罰米一百石數年瑾誅起袁州府同知陞寧波府知府富道喜事者增募鄉兵命編戶輸直富以歲儉民貧持不可市舶閩奴橫奪民嫌捕之且籍閩不法狀欲上聞閩引咎謝廣德湖自宋爲官田輸租特重旣而租調并征大不堪命民陳乞如花嶼湖全折例下所司輒格富憫其困與全折民樹祠自

鶴山以志去思丁父憂服闋補處州山垠聚徒盜曠  
計擒首惡魁之獄其黨怖詣庭願復業富命代諸邑  
民兵食其役兵旣精曠患亦息孝豐寇湯毛九倡亂  
悉委征勦提處兵爲前鋒親抵賊巢擒其魁并黨數  
百以出他哨兵乘之遂殲以盡修學費出永嘉沒謹  
霜雲官道七十里脩治亦無預於民 世宗登極陞  
廣西叅政廣西糧儲素乏富勾稽審覆盡釐宿弊疏  
請廣東折銀五萬兩益之癸未覲後廷旌治行卓異  
者十六人富與焉連陞廣東右布政先是魏督學毀  
寺籍其田巨室爭利之富定議以田克軍餉給學膳

以地爲書院社學醫學有差闕掠崇報寺腴田五千畝稱寺故市舶所建聞富欲毀乃撤佛像祀先聖富謂於制匪宜闕又移文御史改祀崔清獻富謂闕圖土田以聖賢藉口卒毀之至於修築南海衛城從民請設大埔縣治其費俱出潮饒金云丙戌入覲爲忌者所中調廣西兩廣都御史姚鏌委以思田兵事蓋岑猛麾下盧蘇輩結思恩遺孽王受仍爲亂也王受在思恩執知府以下官屬羈他所以衆出掠至膺墟將進逼武緣富決策部分諸將且覘知受空城而出密遣將徑趨思恩先發銳卒百人潛入爲內應受至

武緣萬弩俱發退遁則我師先克其穴賊勢旣挫乃  
議撫處會姚解去代者新建伯王守仁復委重於富  
論事頗合遂下命撤兵蘇受率衆七萬來降田役罷  
朝議欲改土設流富謂思州仍流官田州土官必不  
可廢但稍貶降分其權庶幾上不失朝廷大體下不  
失夷酋之心遂行其議富久居邕管稔知八寨猺賊  
與思田勢相倚請於總督宜以時定旣尅日出師而  
富陞四川左布政連陞都察院右副都御史撫治鄖  
陽報至富毅然終其事冒暑雨提兵入險擒斬無算  
奏凱乃啟行鄖陽歲饑流徒載道妖民周極等煽惑

愚民大弗靖富且賑且捕未幾底寧守仁卒陞富兵部右侍郎兼都察院右僉都御史代提督巡撫之任中貴採珠合浦督責甚急富上疏謂不宜爲此無益以困遠黎故事諸夷許朝貢番舶集廣州百費攸賴因佛郎機之變一槩絕不與通富奏復之初守仁上思田八寨事宜下撫臣詳議富條其便不便甚確皆報可嶺東賊王基僭號海寇黃秀山倡叛以次討平廣東西數處盜發遣將分勦前後三報捷俱有金幣之資廣州會寧寇復熾流毒州縣富奏陳事宜集漢達官軍及兩江土兵分左右軍翼擊之擒斬四千有

奇未十旬克寨七十四降寨如之特詔褒獎賚金幣  
甚渥郊祀覃恩賜封二代富上廣 聖恩以答天地  
疏疏內薦海內名賢八人宜召用謫戍諸臣宜寬宥  
不報富復上六事爲會寧善後計皆從之會寧民羣  
立祠以祀往者撫臣不二年輒議大征富慮濫殺平  
民非安邊之策奏請非甚棘勿事大征於是與御史  
異議云太淑人年高數病富憂懣疾作累疏乞休時  
方獻夫家衆怙勢奪民產富付僉事龔大稔裁以法  
乞休疏至獻夫取旨回籍聽勘富將歸海寇許折桂  
爲梗御史適行部海上輒檄巡海副使某出兵及兵

敗將沒則反以失事爲富罪獻夫從中應之遂落職  
大稔隨被逮以死富歸之明年母卒執喪喪事悉盡  
禮旣免喪預鄭司馬逸老會構小亭於東山纔尋丈  
游息其中戶外事不以經慮御史李元陽保薦起用  
不報聞七年卒年六十六有奏議二卷



正議大夫資治尹兵部左侍郎兼都察院右副

都御史贈工部尚書潘公旦神道碑

總督

嚴嵩

公諱旦字希周世居婺源之桃溪里稱望族從父珍  
官少司馬從兄鑑大司空從子潢大司徒暨公駢武  
天朝文昌正貳冠珮相映一時仕籍鮮與倫比公賦  
資淵篤績學醇貫持行飭於勤毖圖事徹於機宜初  
舉進士授戶部主事以能慎著名陞郎中督運真州  
時流賊嘯聚運道多梗公悉心督理轉漕無滯擢守  
漳郡故多海寇聚散出沒洪洋絕嶼莫可驅除然非

土之豪黠陰爲之主彼亦莫得肆公至廉知其狀取  
豪黠數人寘之法寇以不來丁內艱服闋復守邵武  
時中官鎮守及市舶橫括民錢物公裁之不得逞閩  
俗訟好株蔓連牽至數歲或不解公痛爲懲創變其  
俗歷陞浙江按察副使江西按察使浙江左布政使  
嚴繩寬布官舉其方法立而惠行陞都察院右副都  
御史撫治鄖陽以平劇寇功詔賜金幣改留都理卿  
復改少宰召入爲少司寇山西慶成府宗正寺評事  
持未決公奉命往鞫得實以聞再勘永和府事人咸  
稱平改少司馬復兼中丞往督兩廣軍務時安南不

庭詔用廷議起大司馬毛公伯溫率師討之毛方在制公適道其里見公語之曰安南恃其險阻叛服不常久矣若兵興禍結連歲月未可解資餉不繼奈何公宜終喪辭諸朝可得緩師俟其聞命求貢因而撫之此萬全策也語不合去至廣因得安南不貢狀上疏言夷狄之國本無人倫莫登庸之篡黎氏亦季犛之篡陳氏也今若緩師移檄以問其罪彼必畏懼修貢俾無失臣體而止不問其他此帝王治夷以不治之法也疏入毛公遂劾公不任戎務詔公回佐留都部事公曰吾謀既不用祿可苟乎遂拂衣歸然安南

之事後亦如公議云公家居十餘年不復至臧府獨聞人有急周之惟恐後歲旱徒步率鄉人禱雨爲雨廉以哺餒者久之寒日落而公陶陶然終其身不以爲憂也以嘉靖己酉八月十有二日卒距生成化丙申享年七十有四訃聞朝廷勅管葬論祭如例特贈工部尚書加等也大父貴廉父傳賢並以公貴贈都察院右副都御史母戴氏配程氏贈封皆淑人子四長曰縉錦衣衛經歷次紳次絲郡庠生次繪

兵部左侍郎劉公源清傳

子爾牧附  
總制

郡志

劉源清字汝澄東平人舉正德甲戌進士仕江西進  
賢知縣值宸濠叛源清以縣當午道卽日規戰守計  
揭旗大書誓死報國四字仍積薪環室戒曰卽事急  
火吾家毋汙賊會濠妃親婁伯及閹樂岡以兵出縣  
境源清募死士二百人繞出其後獲伯固誅之賊復  
移檄源清源清立斬其使以是濠兵不得越進賢而  
東賊勢少沮王守仁起兵檄與俱進賊竟殄滅徵拜  
監察御史尋陞大理寺丞擢僉都御史巡撫宣大調  
度士馬歲省四十萬金北虜大舉入寇總帥被圍源

清冒險遣發斬首虜數十餘級虜遂遁去滴水崖卒  
郭春等與民訟辭屈以數百人據城叛源清遣兵傳  
城呼曰禽春等數人而止守陴者執春等斬之進副  
都御史再遣兵部左侍郎總制宣大會大同軍亂源  
清奉命討賊督總兵邵永決水攻城賊勢已窘郎中  
唐榮因得入購其黨斬倡亂者以降源清以藉手逆  
黨爲恨不居其功侍郎黃綰附尚書夏言因爲蜚語  
中傷逮繫司寇年餘給舍曾忭爲之論辯乃得罷歸  
隆慶改元言官交章追論詔贈兵部尚書賜祭遣官  
管葬源清忠貞孝友出自天性崛起寒素偉幹負氣

臨義不顧利害嘗有恩廕舍其子而廢弟之孤人以  
爲難今祀學宮

爾牧字成卿東平人侍郎源清子也舉嘉靖甲辰進  
士授戶部主事累至山西司郎中爾牧天資殊絕器  
度凝重第時年甫二十練習吏事才伏一時在部八  
年權會精核出納明敏尚書方鈍器之請司署奏皆  
與議決西苑建醮詔所徵發常以帑藏空風上聞減  
損其額積爲中貴所嫌會嚴世蕃舍人窩占邊監爾  
牧以名奏世蕃恨之風御史某以變亂錢法劾爾牧  
廷杖一百削籍歸里家居十餘年杜闕下帷披閱典

純自旦至夜手不釋卷里人罕識其面爲文沉澁與  
雅取義西漢詩有陶柳風骨號爲名家隆慶改元廷  
臣文薦未召而卒年四十三歲



司馬恪愍楊公守謙傳

巡撫

屠隆

大司馬恪愍楊公名守謙字允亨別號次村世爲湖廣長沙人始祖順高皇帝時占尺籍隸南京神策衛高祖受徙周府左護衛受于福勝贈資政大夫刑部尚書昭皇帝時徙隆慶衛復徙彭城衛因家焉福勝子春果贈資政大夫刑部尚書贈太子太保諡康惠康惠生公幼而雋異七歲授書善屬文器局凝重若老成人稍長爲舉子業卽以古豪傑自許講說經濟敦忠孝大節嘉靖戊子舉於順天己丑中羅洪先榜進士授工部屯田司主事尋改兵部職方司歷

陸本司郎中益究心戎畧邊務推轂將帥材官登乘  
公法抑絕請託釐革弊孔受知當道 世廟南巡扈  
從車駕還賜綵幣陞陝西按察副使丁康惠公憂葬  
祀行考亭禮哀毀骨立服闋除陝西督學副使校士  
至公雖窮邊下邑亡不身歷章縫興起至今思之祀  
公名宦秩滿陞本省叅政未履任卽陞右僉都御史  
奉勅巡撫山西尋改延綏蓋延綏乃胡虜咽喉西北  
重鎮不次超用公從時望也在延綏三年選將練卒  
講武足食思慮大著虜畏不敢入塞稍入輒斬馘挂  
劔之西垂晏然延綏邊垣稍卑虜每毀之而入公爲

增高厚數倍益置敵臺戍堡虜萬衆仰攻不能入垣  
之力也數獻捷 天子喜悅錫賚無算數降璽書褒  
美庚戌春陞副都御史巡撫保定去延之日軍民老  
幼子婦傾城塞野負囊裹糧號泣遮道祖送數百里  
咸呼曰楊公在邊虜不敢正視西人高枕卧一旦去  
我剜虎牙無日矣甫蒞保定屬北虜大舉入寇圍都  
城中外戒嚴援兵猝無至者公投袂起曰虜薄都城  
主上拊髀人情洶洶爲臣子安忍坐視卽率部下  
精兵三千入援 世宗皇帝聞勤王兵至大喜卽降  
旨楊守謙提兵入援忠勇足嘉其陞兵部侍郎內同

希忠外同仇鸞協力捍禦仇鸞者狠鷲陰賊人也有  
龍於上公督學陝西時鸞爲甘肅總兵潛與虜通  
公聞而密白之中丞臺御史臺事竟寢未發其後鸞  
知而遂恨公切齒至是譖公於上曰楊守謙雖勤  
王實按兵觀望縱賊劫掠世宗大怒逮繫詔獄法  
司擬戍上愈怒罰治法司特旨坐公棄市時年四  
十六都城士女奔走號慟人人願百身贖揚中丞事  
聞於關中延綏諸生軍民咸爲位而哭盡哀公臨刑  
自若曰臣以勤王及旤讒賊之口實蔽聖聰皇天  
后土知臣心臣死何恨臣得與岳武穆于肅愍同遊

地下足矣無何驚造逆未就而死事發詔剖棺戮尸  
妻子閹門斬都市先是公之及旣以八月二十六日  
而逆驚被戮亦適明年是月日人以爲天報不爽云  
驚敗主上卽悔悟公冤至隆慶改元都給事中辛  
自脩御史王好問交章昭雪公忠而受冤詔贈公兵  
部尚書謚恪愍賜祭葬廕一子忠義之士聞而爲之  
鼓舞稱快都城父老有泣下者公爲人忠孝天至誣  
養有道燕居莊肅雖對妻孥不及於媒狎束身理家  
皆可爲法官輒所至皆有遺愛門生故吏生芻絮酒  
蒲服千百里哭墓下往往至失聲敦人倫好施子有

廉第二人庶妹一人悉爲鞠育婚嫁事庶母宛氏若  
親母兄弟同居所得祿入悉推與衆不入私橐三黨  
中生待以舉火死而待以棺殮者不可勝計亢厲廉  
潔一介不妄取歷官至開府大位蕭然猶寒峻恒以  
稱貸自給文章尚氣格雄渾昌大詩亦悲壯有唐人  
風尤長於經濟籌邊有大寧考紫荆考花馬池考兵  
部集譚西北地形要害戎務機宜洞若指掌卽以忠  
受冤有識愷擊乃卒蒙 聖恩昭雪褒嘉在順天長  
沙祠鄉賢在西安延綏祠名宦廟食百世光昭俎豆  
而關中士人有死入冥府見公方爲貴神宮殿服御

如王者生爲忠臣死爲天神理蓋有之公畢命以奉  
君父捐生以殉社稷骨骸壅粉身家破滅受旤至慘  
而朝廷旌其節祭上帝錄其忠魂位證天神名留國  
史光霽照耀與天亡極奸佞讒賊生盜大利死受顯  
罰榮華一旦惡名千秋此烈士之所以孳孳蹈死若  
飴赴義若渴者也不然忠義誅戮後裔凋零冥漠之  
魂亦終歸於何有而奸佞讒賊及其身富貴壽考子  
孫反或熾昌無論人世公道晦蝕卽上帝賞善罰惡  
之權不已疎乎

兵部右侍郎王公夢弼墓志銘

總督

胡正蒙

公諱夢弼正德丙寅二月七日生八歲能屬文總角  
補郡學生辛卯舉於鄉乙未登進士第授掖縣知縣  
陟兵科給事中歷戶工二科左右給事中刑科都給  
事中南京太常寺少卿都察院右僉都御史巡撫寧  
夏地方以有功進右副都御史遷兵部右侍郎兼都  
察院右僉都御史總督陝西三邊軍務進階通議大  
公之宰掖也平易近民有惠政雖旱蝗不爲災比  
以治行徵入諫垣歷七載章數十餘上侃侃敢言多  
所裨益有名諫風時楚世子弑逆上命御史諸公



公持舊典三奏不以震怒爲恐嘗使代藩却諸餽遺  
便道歸省母淑人比還朝將母就養已而母思歸疏  
請送之家人稱其孝故晉產習知邊事居常論議慷  
慨自負士大夫咸以大用俟之矣官留都三載將授  
敏邊鎮而有母淑人之喪不果用既終喪適寧夏缺  
撫臣以公名上卽用之時馬市初罷戎務廢弛公至  
卽疏修邊牆保疆圉備兵馬責實效數事上於朝又  
以戒請託禁科斂謹烽堠嚴戍役時糧餉下令期年  
政成軍民悅服已而黠虜入寇公諜知其虛巢整兵  
襲之斬獲功多捷聞晉秩錫銀幣俾仍撫其地公念

寧夏三面臨虜自王恭襄公修築東邊民有攸賴乃  
於其西赤木諸口度險要修築功成夏人刻石爲賦  
美之上嘉其勞陞二品俸未幾虜再入寇督兵勦  
之再捷上廕子他如繕城堡興水利育人材疏鹽法  
有德於夏人甚巨居六載功望日隆乃有總督三邊  
軍務之命旣膺重任矢志竭忠以紓上西顧之慮  
且值地震未寧尤當其難省費恤民儲材飭兵究心  
規畫隨以三品考績被誥命贈祖父廕其子公曰國  
恩厚矣益自感勵殫謀策督將吏務寧疆宇奠社稷  
而言官論撫臣以及於公上令致仕卽日就道歸

然猶繫心邊塞聞警報則扼腕而嘆遇歲侵輒憂形  
於色曰憂國願年豐臣子分也其天性忠孝如此以  
矣庶弟夢熊過哀疾作竟不起年五十有六

兵部右侍郎兼都御史應公楨墓志銘

總督

唐汝楫

公諱楨字子材少卽端重殊異長益肆力經典工文詞嘉靖乙酉舉於鄉登丙戌進士授刑部主事時惠安張某以贓敗下部屬公訊理按得其狀客有爲張私謁者夜遺金七百峻拒之竟駁正如法太宰許文簡公考績云發巨慙之贓不爲勢怵勵清修之操不爲利誘蓋指此以員外奉命慮囚江西凡獄之大小悉察以情而得其平平反數百釋輕罪千餘甲午遷知濟南府事郡故衝劇公處以才廉恢恢乎有餘地

焉而尤廣勞來蘇凋瘵政蹟著東土銓司最公治行  
奏調常州府常難數倍比至適當定冊稅糧徭役奸  
蠹蠅集如那移增減詭寄隱匿之類蓋漫不可致詰  
者公究極利病詳定規畫裒益以均平之丁據黃冊  
糧據實徵其所更賦役二法最爲精善郡巨姓顧氏  
相訐有司率牽制無能剖決潛以重資求公公發其  
事而當以罪富民吳庸者於公去常之日具百金追  
送於境外曰子倩小人歲無侵擾公賜也願以此爲  
報公謝而郤之庸感泣而去其不奪於利類如此然  
公抗行已志私托不從多所忤鄉之縉紳士而性素

鯁直輒與行部相齟齬乃其弗悅互煽以言復調寶  
慶尋以內艱去任服除補辰州未至拜湖廣副使董  
學事每進諸生訓以德義器識之大者校文貴雅正  
剗其奇靡風教丕振監司舉公志潔行方學優心古  
公論也旣乃遷苑馬卿經理遼陽政異時七苑之馬  
散處郊原倒失不常息駒之數奸宄復漏報不以實  
公爲置廐數百責令每季報生而又覈其勤惰豐其  
芻藁時其調習嚴其蒐閱日孳月蕃列廐雲盛民免  
賠償之苦矣丁未陞山東叅政會妖賊甫平議者欲  
盡誅其黨撫臺亟以屬公於脅從者悉輕釋之未幾

陞河南按察使再遷山東右布政使轉左尋擢都御史巡撫山東值邊疆多壘朝議謂非公不可奉命改撫山西兼督三關於時邊備久弛率不能先事捍禦虜去來若風雨諸鎮收保恒不及恣其擄掠然後洗洋以出公親秉鉞巡行邊鄙山川沮澤之形險阨遠近之利道路支隘之樞及虜所往來出沒之衝固不接堵簡戎行葺營堡謹斥堠更番戍守併聚兵力以扼要害計虜至則累甲荷戈持滿以伺退則設伏要截歸路虜知有備遂徙營去莫敢窺塞庚戌八月虜由古北口入蹂踐畿甸烽火徹於大內公提兵數千

人入衛虜間遁去有銀幣之資陞兵部右侍郎總漕  
於淮兼撫廬鳳諸郡公以淮水惟資黃河易涸而多  
汗歲靡挑濬之費而泗水西流寶應南注大江可引  
入淮於是因五里溝鑿之不費不勞河迄通利未旬  
月仍奉命以少司馬兼臺秩提督兩廣軍務巡撫地  
方桂樂平等地徭僮雜處半爲盜藪而莊頭鬼子等  
巢劫令逐帥爲害尤甚其七山三十七巢諸徭密邇  
軍門據險出沒積五十年餘屢征不服經畧者不過  
多設營堡遙制而已公至論以德意不卽加兵而樊  
家屯馬江等劇賊悉款効帖服惟七山諸寇負遐阻



恬亂自若公審勢察機署勒部伍授諸將方畧親督  
精銳直前奮擊之俘馘以數百計乘勝復攻莊鬼子  
等十五巢生擒百餘斬首三十有奇歸被擄男女三  
百餘口奪牛馬夷器無算次年征七山三十七巢假  
道引兵至潯分哨倍道疾趨比至賊倉皇出敵輒敗  
嗣乃棄巢走公招之不從遂張奇夾攻覆其巢封其  
山籍其田廬蓄物什器令官兵屯住耕作殲獷悍之  
寇而無濫殺之慘因田廬之獲而省轉輸之勞自兩  
廣用兵以來稱節制之師者無踰公焉捷聞荷恩資  
金帛仍廕一子朝廷報功之典蓋甚渥也公軍務勤

勞形爲之瘁竟以疾告終於蒼梧官舍公巨才洪議  
卓越倫輩而水蘂之操復凜如一日所居敝廬布衣  
蔬食無殊寒約諸子瓘訓以詩書閑以禮義至書牘  
福以爲諭疊疊百餘言誦之者可惕然省也公雖不  
苛取不溢費至遇宗族鄉閭之貧乏則盡已有周之  
恒以古道自遵鄉族中有敦行義者則禮貌以勸蓋  
公蒞官必先風化故其所存如此家居未嘗以寸楮  
請託有司至訪及民間疾病輒憊焉改容傾吐以告  
公之學根據六經而尤研精性理究心經濟有法律  
例獄獄程若干卷行於世年僅六十有一論者猶以

未究其用爲公憾云

兵部左侍郎張珩傳

總督

實錄

兵部左侍郎張珩嘉靖三十九年卒賜祭葬如例贈工部尚書謚襄敏珩山西石州人正德辛巳進士授監察御史累陞大理寺少卿僉都御史巡撫延綏尋遷南京都察院右副都御史提督操江未幾召入協理院事進左副都御史會宣大總督罷廷議屬珩珩以鄉曲辭爲言者所指落職久之以原職起巡撫寧夏進兵部右侍郎兼右僉都御史總督陝西三邊前後獲首功甚衆上數賜璽書金幣勞之進右都御史居數歲拜戶部尚書督理太倉未至值虜寇延綏

無量事被遣謫戍慶陽已復起爲副都御史巡撫延  
慶還前職丁母憂歸卒于家年七十餘珩行履修潔  
器識弘遠尤博綜羣籍爲御史時會講官缺輔臣有  
謂珩才行可充侍從者欲推轂入翰林珩三疏力辭  
不就時論高之

副都御史吳公琛神道碑銘

總督

王

俱

成化乙未八月二十五日總督兩廣軍務兼理巡撫  
都察院右副都御史祭昌吳公終春秋五十有一  
上悼惜之命有司葬祭如制公諱琛字與璧號愚菴  
賦性警敏年十四補邑庠生日誦數千言爲文章排  
軀立成儕輩莫敢與爭雄正統甲子登鄉榜乙丑戊  
辰兩試禮闈不利益勵於學一夕方讀書嘔血數升  
母蔣氏驚往視之戒勿復學曰脫以是戕生學亦奚  
爲而公竟不少輟但掩覆無使母知居數年學大有  
進經史子集靡不淹貫下筆爲文益奔放不羈景泰

學未登進士第授例還家畢姻先已久聘章氏蓋不  
第不娶至是年二十七矣癸酉秋拜雲南道監察御  
史奉勅往甘州犒軍已亥巡按四川所至黜奸貪雪  
冤滯明達果斷蜀人懷之三載給勅命封父聰如其  
官母妻皆孺人天順丁丑 英廟復位石亨以功封  
忠國公專權自恣漸蓄無將之心公與同官劾奏之  
忤旨補外知遷安縣五日天變雨雹命還公臺職尋  
被選居臺端掌文案故事凡三司會讞獄囚十三道  
文移刑牒必擇老成諳練御史二人綜理之蓋以裨  
總憲之不及而爲諸道之領袖也時公與同年高公

明對筦五年臺中稱賢辛巳陞大理寺丞歲餘陞都  
察院右僉都御史巡撫西陲莊浪去城四百里有地  
深入秋境前檢田者占數屯糧五千七百斛迫於徵  
輸軍多竄匿公首疏罪之西番扒沙巴哇等七族累  
歲盜邊撫之不服協同平羌將軍宣城伯衛公穎征  
勦之斬獲千三百級馬輓牛羊甲仗輜重無算賊平  
陞俸二級是歲朝廷推恩加封父聰官都御史母蔣  
氏恭人成化改元還朝議事適四川妖人趙鐸謀叛  
改命公往討鐸敗中止蒞臺事時淮揚薦饑尋命公  
賑恤公勞心焦思凡事有益於救荒者率以便宜行



之而言多切直大忤權貴雖民賴以濟而公之謗遠  
矣明年春召還言官劾奏必置公於法公危甚賴  
天子聖明第遷官南臺以避之時代者都御史林公  
聰林公所行事一無更張且言於人謂公實有益於  
民無負於國於是其誣遂釋而聲稱益重來南未幾  
丁母恭人憂繼丁都憲公憂兩遭親喪哀毀踰禮不  
御酒肉四方賻贈一無所受朝廷凡兩遣官諭祭公  
先以僉都御史三載秩滿至是始頒誥命進階中憲  
大夫加封章氏恭人已丑服將終遣使齋勅卽其家  
授之命巡撫兩廣至廣纔半歲代回南臺未至復遣

使以勅授公巡撫湖廣時湖南已數月不雨民嗷嗷望哺公禱祈不數日雨露足自是拊循郡邑問民疾苦窮荒僻陋之區無所不至凡在湖廣者五年威行惠施殊俗輯和會寧夏花馬池達寇入境兵部以公嘗在邊方熟知軍務擬奏巡撫陝西都御史徐公易置而湖廣鎮守三司又從民之欲兩上章留公甲午有旨許留進右副都御史適總督兩廣都御史韓公致仕朝廷求繼韓者僉謂非公不可於是擬公以去去之日郡邑父老扶攜攀送齋咨涕洟而公亦悲不自已當時士大夫言巡撫大臣能深得軍民之心如

公者前此蓋未見也公至廣其撫民無異湖湘而於  
調兵練士則尤加之意蓋嶺南寇盜矯虔其爲患尤  
非他方比也英德流民羅英郭瓊輩聚衆剽掠命兵  
擒之新會新興連界有劇賊嘯聚流劫村落餘十年  
公一旦馘其渠魁殲其黨與六百餘人徭僮聞之大  
駭相戒斂迹柳慶諸州其巢穴也公親至其地檄召  
之許以自新詣軍門俯伏聽命者日以萬數公曉以  
禍福無不踴躍而去時識者又謂廣寇冥頑可以威  
懼而不可以理論以理論之而革心向化如公者亦  
前此未見也公爲人勤敏自童丱至沒齒無日不鷄

鳴而起二鼓而寢雖間外事叢酬應絕無壅滯少有  
餘閒博觀羣書以資聞識上自公卿大夫下至閭里  
後生書敎往復靡不手答動輒盈幅初若不經意而  
文理通貫情意平洽雖屬草有所不及雖身居顯位  
其自處一以謙抑待人無貴賤必以禮處故舊無相  
忘有所饋遺纔及金帛輒辭不受其平生所得俸祿  
又日費於賓友故子姓衣食或不給身沒之後貲業  
蕭然視先公所遺不長尺寸嘗爲家規十八條訓戒  
後人予爲之序公平生所著詩文多不存稿其存者  
惟愚菴集若干卷譜若干卷 上所賜璽書與公之

奏議具在亦足以垂不朽矣

中丞受菴周公滿行述

總督

陳昌積

受菴周公名滿字謙之蜀之廣漢人一號拘虛子父  
南山翁喜諷誦而不廢家人生植貲高里中稱長者  
生公甫六歲卽授之經隨授輒背念如流遣就外傳  
穎洽絕其儕嘉靖壬辰登進士授南京戶部主事時  
年二十有五南戶曹務簡始蒞事卽明作自勵指揮  
某者造僞領以冒官儲遂劾而置之法尚書異其少  
年練裁進之本科凡制置奏覆倚以斟酌可否乃上  
逾年監督浦子口更益植學尋莊定山讀書處拜其  
墓葺其祠刻其遺集於邑齋旣還都聞高陵涇野呂

先生躬行君子也內修外文止進可範乃折節事爲  
師朝夕聽其討論退而證諸實地以自稽省事必求  
無忤於夢寐乃已嘗擇峻行富文之倫茅少塘諸友  
係會業於南都名勝如鍾阜鳳臺牛首獅峰靈谷等  
山諸名利各有會所分經子史漢晉唐詩爲課限首  
以交核行藝相學一日念父南山翁暨母夫人年高  
特迎養京邸夙宵必冠帶人子舍候省爲常日令內  
人市江魚浙酒爲供具酒數行輒高吟座隅吟已起  
舞當彈吹班綬之樂二親懽甚忘其在客月一赴山  
寺之會必稟白乃行至則各校課程勤窳旬餘乃罷

爲文專準史漢遇天清風淨借諸同志放舟大江流  
觴梅水旣八功德倒流踐燕子磯觀飛棟驚檣跼鳶  
筌魚之勝一有所獲率形諸長歌近體直逼王沈岑  
劉諸家未嘗剿其片句自輔間取材六朝多清麗昭  
曠之趣於是牛首鳳臺燕磯石佛獨喜誦受菴詩矣  
戊戌擢雲南府知府雲南爲會府輻輳至則慎守官  
度承馭一循事矩刻廉自喜滇故有海羣水所匯而  
地獨下洩水之口隘甚沙泥易淤而行水愈遲衝墮  
四漫槩滄濱海之腴田歲收不上數千鍾公私俱病  
先是撫滇者議屬郡堤濬之後止濬于河疏五山橫



流以通海口行之已久嘉靖丁酉白泉汪公巡撫雲南察一時監濬武員爲奸利輒罷之先後檄藩臬郡守臨視咸順風旨自是海口益淤如岸居民蕩析田盡萊公甫入境民遮道自言其苦遂力白監藩轉聞於白泉比承檄往視郡去海口不百里顧假之廩關且面授罷濬之意更確公佯應諾旣循阡達觀果如民訴喟然曰是可畏上嗔而貽民嗷嗷乎今惟省役費易府佐督之不易畢事乎乃條濬海口之利與不濬之害畫圖述策以上曰泉怒其異已下於藩監曰此必喜生事者踰月密訪輿論咸寃其罷濬爲厲尋

檄同知濬治如議於是淤積漸去海田歲大有獲公私供需咸資爲長利矣逾年遭母夫人憂去癸卯免服補守鞏昌公力行教化務在敦琢而休煦之首選學官弟子經學道義有師法者列之便座口授經書訓以性命人倫之要學必由橫渠以志於聖人治必法三代爲條教使各歸教其鄉里務踵藍田鄉約之美以藍田呂氏橫渠張子皆陝人也鞏民由是知嚮往二賢尤注意於孝子貞婦鰥嫠獨貧介之儕里表戶闕隴民關世安獨居養母母沒廬墓三年恥從人句貸年三十二未能娶公聞之捐兩月俸資予世

安置妻舉人陳爵能文死無葬具母妻靡依乃爲爵  
完葬具復旌其母妻如儀計日月給以廩著爲則爵  
妻得養姑終身生員許國忠楊熠等貧不能葬親舉  
人何遷等無居各力爲處給熠等始獲居食國忠父  
母得不暴骨淺壤其喜賑寒倖類如此又訪遐村孤  
老得數十人時其寒煥處其粟布病予醫藥間有獻  
饋肥鮮不入私邸割以頒之弗遺一老以故歲入俸  
餘亦緣手盡跡睚眦武斷白徒一一寘之法馭屬吏  
寬平有威不忍橈其中衣朴之然嘗洞其陰伏受取  
雖一錢以上無能匿吏救過罔暇孽賊趙廷學暴聚

亡命剽掠鄉邑長驅抵鞏東沙灣關虛無人塗面罄  
劫商貨公覽商訴急圖殪之會羣盜竊趨鞏之北匿  
小城旅舖中僞言欲易弓矢衛士走報公度此卽賊  
擒矣密遣力士環而圍之別添兵扼其歸路北明僞  
就縛郡人尚酣卧不知也治不二年翁都御史朱觀  
史交割其賢乙巳擢廣西按察司副使去後關孝子  
生子名之曰周父以誌世感鞏人思慕不已胥造胡  
都御史纘宗所請立去思碑文至比之文翁寇恂朱  
北海龐仲達云西安馬谿田理陝中大儒尤矜然諸  
與檢討王九思讀其碑稱爲篤論公得兵憲乃獨赴

廣東廣右多峻山而府江蔽谷味洞更彌尤易叢盜  
徭獍民賊盤穴其地者十之八賦役之民不及一二  
山南三洞賊尤雄剽常伏菁薄中候官民船突劫之  
當轄或不免焉平樂李進邦陽朔陸公眉富州劉苟  
勝皆民賊之崛起者也公眉獨外糾兩賊內結三峒  
勦率千數人互出橫劫官庫城獄多所侵剽又倚險  
爲巢跋扈甚往年制府下令遣閩帥兵憲先後雕剿  
之俱不獲一矢而還閩帥伏辜公眉愈肆猖獗二十  
餘年睢戾恣殺當事者憂莫爲計公始至平樂卽思  
參寇必先養兵養兵須同甘苦遂減膳省役開誠布

公日閑其兵而練之閱五月而兵可用適平樂守以  
撫進邦復叛之故來白請兵道撫之始從乃遣人  
花幣與守俱撫尋陰部所練兵夜斫其巢斬進邦  
焚其穴兵勢漸振復訶苟勝嘗奪縣民女新寡有  
者專寵之乃繫女父譙其婚賦死罪陰教連女請  
可密報至期苟勝夜果挾婦至父家勒兵擒之還其  
女於父公眉始懼請撫公度眉不可鵬剽廉得其外  
甥婿矢媚在陽朔爲其耳目謀有官兵屢走報之公  
眉藉得先備以逞乃誘繫其甥婿勒爲服辭附卷示  
之曰若能粹至公眉不惟寬若死罪且在大賚爾

謝自燒贖命遂賞之百金忍其出入令子尸家臣  
反秘計是日東下梧州示遠出以弛其備令署治具  
山寺謝眉眉素善筮以筮凶不往月餘復令婿申請  
筮又不吉婿恚曰山寺之避舅志也今圖大家邀不  
豈將以反噬乎况寺平曠不可設伏兵道又久下梧  
何疑爲舅今不往請從此絕公眉重違其意厚甲重  
鎧率精騎來會公陽遣衆直禱潛伏精兵於徑以俟  
日暮酒酣婿佯報曰官兵至矣舅從徑路可反救也  
公眉倉皇前走遇伏起梟公眉頭於路殺從賊四百  
人餘皆糜而辟易徭僮鼓慄不敢近陽朔人見公眉

頭撫掌曰二十年禍魁今降矣戊申四月間翁計一  
哭幾隕踊時卽徒跣上道平樂推官劉方興借僚屬  
力勸之次日行未遲又泣曰父子天性爵名外物父  
死吾何望生乎誠不忍停半餉也遂長行方興爲檢  
發其行李止雨木篋貯衣數襲俸銀董董五銖而已  
方興驚其廉苦不覺感泣旋爲市早車迫至桂林提  
之張侍郎岳聞而嘆曰昔軒尚書輓考按察使滿僅  
二竹箱出門比聞外訃次日遂行識者謂爲純孝矣  
何如周副使之行不停踊也方興吉水人嘗以語人  
云公自守輩昌兵備府江之後人多其用武康惠



山東副使專轄徧屯田水利會給事李滋御史李一  
瀚聞其任葦輿時方畧可顯受特疏其名委之清保  
前宜大山西五鎮邊儲公得命卽以季冬抵京會給  
事御史兩人宜讀勅諭事條尋赴宜大各鎮盤閱軍  
儲鉅而帑廩微而絲忽合勺覈一如制乃得總兵某  
都指揮使某千百戶胡升等侵隱諸罪復會科道酌  
上下服而叅論之經旬畢事於是議邊鎮之智帥才  
臣素著多勲者各咨以戰守攻御之宜堡徼築設之  
備與練習慰帖賞罰信必據切之方候聽其叅伍議  
論更閱尹耕所撰鎮誌畜衆編併所爲火器造勝累

日頗獲異發然皆酌裁於心退則識之於快嘗誦劉  
絢募兵不如養兵擺邊不如合戰數語乃上疏言畿  
甸所病今在民兵夫民兵者計號集天下材武爲破  
虜先鋒也時勢旣殊邊塞少安宜思長猷以善後圖  
臣嘗細詢將領諮問邊人及體察諸民兵知北直隸  
民兵可用山東河南山西次之若南直隸者不可用  
北直隸者可久而山東山西河南者不可久也何者  
直隸素多武勇騎射之士平居往往有恃之以作禍  
者去歲一呼此輩雲集操練本土不以爲勞調戍薊  
州不以爲遠風土相宜音問相及恒有激烈求試之

意故爲可用山東鎗手歲調宜大其人粗悍猛厲不  
難就死河北義士忠勇素稱山西近邊之民身親戰  
開但選材有方未可槩取故稍爲可用乃若南直隸  
者脫粟之飯不能下咽沙磧之場不能張目一馬羣  
裝重至百斤一行跼蹐超不百里況望其能摧鋒破  
敵鼓勇立功者乎初駐直隸行糧所支不下十萬繼  
戍薊州犒賞又復不賞益無尺寸而損至尋丈故曰  
不可用也直隸近京師惟恐武備不盛往年躲丁朋  
合所得皆非奇士一旦樂民兵之名知非世繼又有  
勇聲挺身應者大半豪傑輩也雖少仰給於官而官

亦得其實用又其應募以來商賈去業工匠棄藝家  
食官給之銀身無力役之擾一旦舍之不惟少有怨  
思而開身利器游手雄心當有苟竊發下故爲可久  
山東鎗手素擅礦冶之利河北義士宿雄急難之風  
山西諸邊民多獷悍勇於公鬪習於掩虜若統之以  
有制之將示之以知方之教尤能委身向敵緩急可  
須至於東兗之驕黠河南之純靡汾蒲之慵惰皆閭  
里細民耒耜下戶一人在戍田地荒蕪一時役身差  
稅全負去歲之來供給優厚尚且內顧自茲以往所  
給太減若禦徵之逃亡立作矣故曰不可久也又況

各省民兵以徭戶雇役以貼戶供丁所費不貲民已  
重困耳目所睹記民已大半逃匿矣不及今爲之議  
省後將何支臣愚爲今之計旣增國威又順民願小  
省行糧大恤畿甸之法無如習北直隸一營民兵平  
居操練遇秋應援其山東河南山西者則免其二千  
役其二千使相幫貼以俟後處一以蘇徭戶之困一  
以精武士之選至於南直隸者勢須槩罷但解支費  
以給北戍是以兩省給一軍兩人併一騎也以壯爲  
衆以飽爲逸計莫便於此 上率用其言是冬都御  
史巡按御史交章論薦擬之邊材謂可當西北雄鎮

明年癸丑陞山西叅政駐節靈武是時俺荅大發寇  
賊薄犯渾源將闖紫荆窺京師我師防禦甚急公提  
兵覈餉夙不假寐旋議援應方畧會趙都御史簡閱  
將卒易置戰守出大水口駐陽方皆虜必衝之地議  
俱撤備合兵內地與虜決戰公諍言棄外禦而增守  
內垣非計況虜強未可必勝也乃巡和民八角等地  
申飭將領濬修池隍以都御史檄日校武士部勒行  
陣擇其梟俊者閑之使兵將識情人精慣藝其有能  
墮圍陷陣引射命中寇至能騎危牆立衝突弗動者  
爲材勇賞不移時否則捷戮隨之士益鼓勇思效七

月虜犯紫荆公度其兵可用督戰廣昌虜邏不敢度  
關撤寇平荆益督兵血戰獲級九十捷聞加賚白金  
十兩趙都御史薦其蒐卒修邊保障無虞廷議以爲  
未盡繼條數十事呈之撫巡隨其廣鹽利同文敘嚴  
內備查冗置四事上之俱奉俞旨得行是秋虜再犯  
麥川將士受餌故北李涑總兵父子馮叅將李遊擊  
皆死焉朝議洶洶後知餌將違分守計畫止奪罰俸  
三月公感上恩嘗蒐討羣策陳畧輯兵志必死綏  
而頸虜酋爲報甲寅轉雲南按察使雲南綰南理沅  
麗等府二十有二習俗仍夷焚惟南理臨安近華土

產珍具充盈吏於其土者多懟遠惕居懷日暮塗窮  
之計類浮沉乾沒思滿橐而去公憫其迺習成風又  
厭猾禍文深爲害然職在澄清乃撥墨行最著屢爲  
民告言者卽訊知州林天駿知縣王某尤倚援厚善  
京貴貪剽不遜指揮張顯宗趙顯祖等挾三品銜剝  
剖非法自擅率叅鞠如法而各坐辜關寄一切不行  
文秩解印綬遞去者數人武吏股弁孟艮孟定雖在  
荒服之外視若內境而法訖行滇民壑辨懸填猶譙  
公爲守時風貌咸呼青天青天云乙卯轉陝西右布  
政使會左使先期入覲至卽攝篆事屬歲大侵冬地



大震崩山頽陵民屋裂陷水泉飛湧水盡火出千里  
丘墟存者驚於訛言奔走蹂躪不逞之羣乘時稱亂  
府以下倉皇避匿公單車徧視緝不逞魁杰數人械  
之市須臾亂定已乃請於撫巡發帑貯廣賑恤捐俸  
資一死喪嚴倣巡邏弛徵役以軫時艱告神祠以省  
吏大清繫囚以蘇淹獄修頽城敗庫藉工作以寓救  
荒停公宴雜會省繁費以助介匱撫巡一如所議乃  
退廉吏四出問遺關中父老災縣焚獨受賜各傳諭  
其子弟安堵就業如常其他恤勞匪頌恩艱圖易之  
文不可勝紀拮据五閱月而忘瘁逾午地猶震民間

知公痼瘵殷勤無復驚訛新提學學顏序云關輔間  
有大變事能鎮而弭之者有一二大僚在焉比至知  
其爲公也丙辰轉山西左布政使覲地否時艱弗獲  
展布又以在陝支變過勞成疾上疏乞休不允明年  
朝議虔鎮綰廣閩爲一都會舊撫新民叛服不常必  
得才望重臣督撫之廷會以公名上擢爲都察院右  
副都御史巡撫汀虔四省提督軍務初公之未至也  
岑岡賊李文彪賴清規等越境劫殺火人廬舍後四  
月公甫至越二日得龍安兩縣民告言彪稱亂故遂  
下令四兵備振軍威復團操專事開練登塲校藝弗

得循習虛貌遇有心計者爲師演練各率乃下其機  
砲弓矢隨各卒熟能而鼓之又且懸購賊首優待料  
官破格密予不局常條四道各報行如今文彪等聞  
之懼而稍戢先是九月大壩上抗賊首王子文梁能  
等分陣蟻進圍掠會昌瑞金城堡公遣通判督指揮  
等禦之射殺其頭目梁能聞文敗自瑞金竄遁潛起  
軍化突圍其城欲劫各省市本官鎮時汀州通判鄒  
子進豫乘指授率寧化縣知縣邵某等出兵衝賊力  
戰擒能黨顧子傳擊傷二十餘賊能遁入廣昌王子  
文恥會昌之挫冬十一月集黨千人自號飛天大總

突至蘇洲奪舫順下聲言借徑往劫興吉會昌謀報  
適至吉廬豐泰安泉諸人聞之戒嚴城閉二旬凡高  
貨之民捲家匿泰和新城至無屋可賃公下令大開  
虔之四門仍遣黃通判統指揮董珖張敵余璉等往  
擊面授機宜設伏掩襲合於利則動不合則止勿以  
窮寇而遽擊之也敵璉兵至田村賊望見官兵追急  
旋詭爲村民狀陷報流賊已過子文各執鋒械竊伏  
空舍以三百人張白旗遶出山後敵璉不知也奮猛  
與賊接戰擒丁學顏六人賊縱伏突起珖違皆錯愕  
奔墮墮馬被執于戶孟息死之公得牒尋選贖寧會

興鄉兵令各知縣分領來剿賊知梁口有備奔至興  
國焚劫鍾氏屯覺三日敵等領精騎火器乘夜掩擊  
獲賊從鄧壽賊夜潰竄至雩都佛嶺又爲各地土兵  
所挫遂不暇入泰和萬安境矣公聞賊退計刈之歸  
路復檄副使委指揮金堂調石背長河士卒協官兵  
會攻先後追奔搗營獲俘獻賊賊幾靡隻遺是時兩  
僉事函賊首或牽縲反接獻賊軍門公乃緣鵠寇兵  
興顛末研覈功罪浮實及有司將領勇怯效驗具疏  
以聞公又見虔寇湧出無時兵壯素瘁飢乏技衛弁  
雖衆大半乳豎庸闇緩急難倚藩可又多員缺一人

管攝守數道或視嶺北漳南多故憚往復疏請於所  
轄嶺北嶺東漳南嶺南四道並各專設分守一人以  
叅政或叅議任之請復如成化中例仍設叅將於會  
昌節轄四省蓋分守專設則期會可必緩急胥倚擬  
議叅將節轄則職有統紀儻臨巨測則以有制之兵  
加之烏合之孽如舉匹雛爾部復所請各專設分守  
如議任未恭力疏病乞休而去去之日猶恩恩指設  
所奏允諸宜以貽來政天水胡繼宗曰受菴爲人饒  
術足知惟暢朗爽特甚一聞涇野先生躬行之說專  
以四教三省爲存主務日有可見之業爲導國行

嘆世儒徒嘵嘵大心之窟反洗梓而無益於據宿也  
自部郎以至大吏每默識其意嚮浮雜施爲安矯輿  
其政事之發邇見遠果稱日食月餽之人否爲內盟  
一帙出入袖以考鏡盡尺寸不敢失與人處造次  
離洞其肺腑不侵爲然諾尤敦素有分誼者如膠結  
絲綰語輕移日身居隆貴悽悽然若寒士見人單詞  
踴行退然自以爲不及也謂在靡疾言厲顏忘人怨  
謬嘗言甯成居人上操下急如束薪此傲酷安可比  
人所至倡下吏以公廉相砥感以至誠遇有咨稟遣  
委霽色待之語次尋繹叅它匿傳以相諏證使各竭

所蘊悉對未嘗折逆間有負之罰亦必行然終無叱咤相加其有賊不入身能懲前自淑者反爲杖拭灑過故下吏咸思飭勵爲報有急輒以聞素精敏吏事手所出奏疏卷移皆文理縝密不可得反然深以綱絡詭戾少愛利爲惡歷滇粵秦晉吳楚宦跡幾週海寰然動嬰事變艱大嘗以身當利害屢立戰功洎賊貯舊俱司府首領都布吏胥領之每僞立支日冒割人已公廉得其奸毅然刺舉如法首領吏僧俱發戍其叅知晉藩也議邊儲折色訾賦新則與廟堂爭可否而卒從其確東魯靳學顏曰公不爲抗激之履維



駿之辯卮言而裁羣議之端酌行而趨者則焉脩其  
文詞惟冥契神理而生色乎自然之質不掇其英而  
芳不和其味而調蓋翩翩溫恭君子哉公領符鉞過  
家適其經師周憲副洪範病步往省之拜於床下獻  
薪金爲壽副使以廉隅貧甚旣死棺斂靡具妻子以  
告公遂以所置生柩與豫下葬衣絹帛槨之親視斂  
含服衰哭帷旬日乃行漢中後學因是益知崇師所  
著有古文詩賦奏議家譜二百餘卷爲楊升菴所選  
有文集有續集行世升菴目無勢卿獨稱其詩具體  
古人塞垣等什尤可裨經畧非

流連光景者比識者  
亦謂爲明鼓吹希聲

兵部右侍郎兼都察院右僉都御史鄭公汝璧

墓志銘

總督

孫 鑛

余甲戌登第入禮部見一衣冠者自堂皇下問之堂吏云新儀制鄭公也脩然鶴舉望之如餐霞人無何余自職方主事調主客則爲寮友矣時署中諸公方共讀漢書公卽訂約期十日各攜所讀帙來直會者卽誦衆坐聽之有疑義共相與析皆渙然冰釋蓋公每遇事輒立一法皆力簡而事集後人享其益莫能改不獨讀書然也儀制胥徒多吾郡人嘗私謂所知曰縉雲公甚能於官聰察無與比我等每聞傳呼聲

輒汗出洽背謹思而封無譙訶乃已親藩名封屬儀制諸掾役分曹納賄習爲故事世宗自興藩入繼大統嘗其中貴歎息曰禮部好一王府和公乃緡諸舊牘定爲畫一例具草大宗伯奏行之自此宗藩各自知應得不應得不問諸役儀部稱肅清焉是時宜興萬文恭公爲大宗伯甚重公公又贊行定制度抑奢僭等數事於是京師一時翕然稱鄭儀制有疑事必問曰崑巖公云何若余輩同署者則尤傾心服也公隆慶戊辰進士初授刑部江西司主事累轉雲南司郎中雲南司典畿內京師人頌公明斷咸願就質

爰書成於手受罰者自以不寃錦衣主緝諸不法健  
役貪功以鷹擊毛摯相師獄辭多誣公一一反之且  
命衛役不得入署門宿猾無所盡其辭持衛篆者亦  
心折焉大司寇石首王公精於察獄諸司屬莫當其  
意惟公所斷無駁辭謂公才可大受而江陵公初當  
軸銳於求才聞公治行以爲絕倫欲調公銓部銓部  
諸公慮公來或出已上得儀司缺遂急調之儀制與  
文選職方京都所謂三大郎者也乙亥竟調驗封余  
自馬上聞之以告王尚寶敬美敬美曰此兄竟用耶  
於今事皆首揆主之今崑巖兄可謂知之最深者矣

然竟作得何事此語近似然亦未然公在驗封可半  
年姑爲陸沉狀亦陰有所推轂丁丑大計外吏則矢  
心以黜不肖有一二犯公議者其人方走首襖門下  
蹤跡甚醜自謂立致開府閭巷亦闕然謂然榜出竟  
俱黜聞者且駭且快且服又有一賢者時相銜之必  
欲黜公力持再三未能得時冬月已行盡會有巨寇  
自其境發覺旨下削籍次日公往見則曰某者昨已  
處矣若謂我亦能予奪無俟汝也考功例入春闈分  
校而江陵長君方入試與公同經公竣事卽移疾則  
以驗封員外郎徐公元太代長君果在徐房不第乃

大怨公曰渠避不就他人安肯中我踰月轉文選履  
任日卽題推典史故給事中趙公參魯以推官超擢  
福建提學僉事同署皆謂涉太奇乃公作用固如此  
公嘗謂事機不可失一見端卽當斷行之稍遲恐生  
他說又謂天下才自足供天下用特秉者未能無私  
然慎勿以有私待之參伍事勢以資與才與地相提  
衡焉私無所容矣果其人宜私無害也慎無逢迎顧  
逆鱗亦當避因指科場事云此亦一逆鱗江陵有私  
人在留都其人急欲入都資亦適及而公力持之是  
時江陵當軸五年諸隙未開自謂無絲毫玷缺以正

論格之方且欲據善曰此正我意是以公在選司稍  
得行其志所推舉悉合士評至此公不奔父喪而大  
防始決裂矣公力裁抑楚人所求多不遂彼黨恨公  
刺骨云此自我戶內短長何容汝外人持之前此無  
由生隙故默然相安至此則籍籍談公短矣相君雖  
內弗能堪然自謂已所獨拔恐見短於彼黨又恐盛  
摧之名反歸公故但貶公俸猶委以選事踰年仍陟  
公太常少卿然不數日卽謫外癰已潰不得復留也  
任福建右叅議一年持大體孜孜以撫民爲念案牘  
必清嘗與余書曰晦迹海濱循故轍以行此心湛然

回思三署恍惚如夢幻蓋在內多齟齬公拮据心苦耳無何遷廣東副使轄瓊州是時權貴多銜公公自列卿出又嘗典選乃遠麾海外怏怏不樂遂抗疏歸二尊人俱在堂深以得侍養爲懽公素潛心理學在西署時盛有講學名兼習文藝又研求經世之學摭撫往籍類分之彷彿如通典通考大學衍義補諸書然皆撮其精要不枝蔓約有二十餘帙余同署時曾及見焉旣閒居則立爲程蓋日率靜坐者二時餘則仍勤勤著述事閒從邑中耆德李參知鍵等爲杯酒歡或相約登臨搜奇探幽寓目於鼎湖芝峽間其持



家甚嚴凡接見客會計家務皆有時傳語各有人家  
人遵之不敢違肅然如官府已遭母樊淑人憂哀毀  
如禮蓋家食者十二年辛卯起井陘兵備副使會先  
任者遷赤城參政赤城乃在上谷最北直懸出塞外  
三面皆虜虜情最劇其人畏往丐督撫爲奏留銓部  
遂以公補其缺公不以邊地爲苦不以遠徙爲憤坦  
然就官至則以軍容肅下略去內地苛禮時衣袴褶  
與諸將馳走郊原校武技講戰略赴陽和調制府皆  
以馬不以輿時虜酋稱臣久邊塞少事然夷性難馴  
時時小爲劫前此者恐開邊隙多委此忍之公則縱

騎兵斬其首虜執爲辭公曰汝爲逆安得容汝且我  
中國人爲盜者皆殺無赦況爾醜虜虜憎服去鍾給  
事羽正閔邊報疏云臣徧歷諸邊明目張膽敢言戰  
守者惟鄭汝璧一人而已賜白金文綺是冬晉河南  
左叅政明年遷榆林中路按察使西虜不款公風勵  
諸將勤訓練戎務改觀明年遷山東右布政使尋擢  
右僉都御史巡撫山東實代余是歲河南山東皆大  
饑公加意軫恤諭郡邑權宜通有無給金米又命諸  
市集具值粥以待餓者委任得人給有次第饑民咸  
飽無爭競所活六百三十三萬有奇土人勒石記之

青州賊魏邦齊倡亂殲之賜白金而河南遂至人相食天子發帑金萬餘遣光祿寺丞鍾公化民兼御史往賑之公卿皆捐俸大司徒蒲楊公揚言於衆曰救荒乃巡撫職若一值荒卽發內帑安用巡撫爲今歲山東河南饑饉同山東有鄭公遂若不荒者然河南乃如此衆皆服其言倭奴破朝鮮駐釜山者二年人謂東土隔一水揚帆卽至公募標兵調浙兵以束伍法整齊之士皆可用備嚴而民不驚陝西直指奏公前搗巢功再賜白金會有舊銜公者在南都中公飛語南臺不察遂以入冒濫疏中旨下改南京別銜

門居無何父石舟公捐館公性至孝在西曹在山東皆迎養而兩次歸皆獲褻大事若天有意者丁酉倭報復急余忝總督薊遼特薦公經理朝鮮以守制不果用已亥起南京太常少卿南都多暇今亞輔福清葉公爲南少宗伯公與約同讀司馬公通鑑究理亂興壞之跡所評駁皆疏於上方以互相質其得失每以今驗之非徒以炫博焉壬寅仍擢右僉都御史巡撫延綏延綏公舊宦地悉諳其形勢要害兵爲天下雄諸裨將多公舊材官指使如意虜酋炒兒忽明愛等寇孤山紅崖墩大帥李如棹擊敗之火落赤犯

安邊大帥杜松破走之復窺懷遠遊擊沈應蛟戰却  
之皆公發蹤指示功也賜白金文綺乙巳遷兵部右  
侍郎兼僉都御史總督宣大山西軍務 皇孫生祖  
考妣考妣錫誥命廕一子入冑監候代久丙午夏始  
蒞任明日疾作時虜王死應嗣封者方遠牧西海上  
未來諸部落觀望莫敢動亦有垂涎越封者故詭其  
迹東西跳梁衆情脉脉懷疑諸將吏皆緘口待公公  
至則惟講戰守檄行諸道修城堡練士卒治器械間  
召故大將麻貴董一元等談用奇出勦之略置封貢  
事不問虜諸酋計窮又未卽甘搖尾然公疾則日增

乞骸骨者三最後得准回籍調理至山東荊門驛卒  
於舟中尋以延綏軍功廕一子錦衣衛百戶世襲又  
得旨從優卹贈嗟乎孔子昔稱才難異哉公之才也  
循循守矩矱耳而中特精及毫釐自道術文學政務  
法律及諸技藝瑣屑事凡人所能者無不能而政事  
尤長見吏跡輒取亦不硜硜必欲行常以虛平待之  
所至靜默弗炫露若值其機合則斬然斷行久遠功  
頃刻立就已過則如無事然待人無纖微拘而能曲  
體悉溫然推誠屬吏莫不惕惕畏竟無怨者日不倦  
應酬而常閑暇徐方伯成位亦今時異才昔與公及

余同署於時公方有時名然徐未肯下也及公後撫  
山東而徐適起家爲海道副使親受事於公乃始心  
服與余遇徐州歎曰昔與崑巖公同事年餘乃不知  
其超越若此沉細而發必中真不可及卽素不甚合  
者語及公亦無不推服焉公內行脩門內怡怡族黨  
俱頌德素明法家言在西曹有律解人爭傳錄之後  
撫山東刻行儀制刻有 帝后紀略諸王表驗封刻  
有功臣封爵考臣謚類鈔家刻有由庚堂集皆行於  
世生嘉靖丙午正月十九日卒萬曆丁未七月二十  
日得年六十有二父諱重祖父諱文皆不仕俱贈兵

部右侍郎兼右僉都御史又上處士諱因邵武丞諱  
鑾祀閩名宦始祖諱桂山陽人宋紹興中仕緡雲令  
卒因家焉至邵武公十二世也配周氏少保公南孫  
女贈淑人自有誌